



楚正庭者
 養與諱
 後集二
 十一
 卷

譜卷二十三卷六
 今南漢區氏開雕

粵詩倡自曲江至我



朝力追正始昔人論者詳矣故由開天以迄洪永風靡以
逮馮黎赫然懸通國之門不僅貯名山之寺業經傳誦無
俟闡揚已所可念者風流頓盡結習未忘頭銜欲署詩人
身後倘存文集丁敬禮之言達徒知以爲美談陸平原之
書成難說更無遺憾班蘭臺誰與伯仲自古相輕李昌谷
不乏親知彌年竟絕敢輕萬戶能值幾文輒誇威鳳之毛
終飽蠹魚之腹昔者雙鬢迭唱十手曾鈔德林才名業謂
古賢之比侍郎文藻何來賈客之求月苦風酸草亡木卒
果知神物仍與護持同是鬼才定增淒緊竊與玉生譚學
博言及未嘗不愴懷逝者慨念斯文也然而古往今來天

楚屠舊書序

一

壤之生才不少山長水遠江湖之嘆逝可知誚切維桑悲
深宿草耳亦有通儒碩學手筆典裁早付琬鐫吟研嘆服
朝成暮遍爲後進之所宗贍馥殘膏笑他人之未足廬山
宮裏苦學賈闓仙之詩吐谷牀頭業有溫鵬舉之集嗟嗟
文章公器宜窮達而靡遺嶺海人材慶遭逢而輩出理原
合轍藝擅瀕門玲瓏其聲波瀾莫二并當甄錄俾益流聞
者也爰與學博露鈔雪纂好寫畱真或稱昆弟之交或屬
丈人之行或執業所曾事或聞聲輒相思或望重紀羣或
姻聯秦晉裨殘補缺刈楚蕪或與古維新或當今無輩
或精思能至或偏嗜所存得前後集各若干卷署曰楚庭
舊遺詩末附東坪先伯霖川先從兄著撰焉亦元遺山

中州集小長蘆叟明詩綜例也譏遺佚以奚辭待蒐羅其
敢緩壽之剗剛慰彼英靈尤可慨者家青田大令與聞此
事業作古人地下修文倘論弊濶人間撰集又益姓名循
覽篇章彌增愴恨又簡永庵孝廉正抱人琴之痛倍深鄰
笛之悲同屬故人囑爲將伯乃安石之碎金未覩而醴陵
之餘錦先貽薤露易歌藤陰誰醉能不悲哉素車白馬未
踐前言斗酒隻雞宛然舊約則此集之刻又烏能已昔王
阮亭尙書感舊集曾賓谷直指朋舊遺詩來特感乎今雨
樂非操乎土風又直指江西詩徵阮儀徵相國淮海英靈
集則遍徵文獻於鄉邦不復分人物於今古至畢秋帆尙
書吳會英才集又僅論所見半屬生前今者勒成一書稍

楚屢舊壽序

二

異厥指誰附選文之僭猶然挂劍之哀業此半生冀公千
古此冊敢期其不朽能言肯聽其無徵漫疑獨私乎嶺南
更合所知於海內平生畧見第仿張爲主客之圖勳業何
如此亦王粲英雄之記道光癸卯閏七夕南海伍崇曜謹
序

廣東火
南海伍崇曜紫垣輯

吳蘭修

字石華嘉應人嘉慶戊辰舉人官信宜學訓導著有荔村吟草 譚玉生云石華嘗自榜其門曰經學博士又曰食四十兩俸藏三萬卷書著作等身刻有南漢紀五卷南漢地理志一卷端溪研史三卷其他有裨經史者尤多兼精算學者方程考學海堂二集刻之阮儀徵師相續補疇人傳及焉吾粵與者黎大令應南亦附見李銳傳中耳宜其自詡喚作詞人死不瞑目也然實工倚聲所作如西

楚庭耆舊遺詩後集一

一

子毛嫫有天然韻致宜直接北宋人之脈南渡後諸子當與鴈行歲丙戌余屢載酒珠江藉陶寫中年哀樂石華間與同之有校書曰紅梅者石華以管領春風四字榜其粧閣並贈以洞仙歌一闕云鸚哥喚客正夢痕纔破故意迴身壓衾臥儘侍兒扶起欲語還慵渾不省昨夜枕函釵墮 水精簾底下看慣梳頭特地畱人鏡旁坐自小愛天然掠削雲鬟也只是尋常梳裏待料理扁舟五湖歸便一曲漁歌教伊低和今存集中又有所謂海棠者熊笛江廣文贈以如夢令一闕云爲甚香桃骨瘦花壓釵兒欲溜禁得幾相思拌著一雙眉皺紅豆

紅豆可以海棠依舊回憶前塵宛如隔世而石華
與鴈山君模夢秋心齋棉洲諸子又已久作古人
讀桐華閣詞懺盡閑情亦如洗馬渡江對此茫茫
不禁百端交集

茶村詩話吾粵倚聲之學遠遜於詩流傳始於五
代黃損譚玉生明經論詞絕句三十二首專論嶺
南人其第一首謂竟傳仙去也多情得近佳人死
也榮誰謂益之能直諫平生願作樂中箏也若有
集者則宋劉鎮隨如百詠迄今未見此外若李昂
英文溪詞趙必瑒秋曉詞附詩文集中余嘗爲刻
之元明兩代作者寥寥屈翁山崛起慷慨激昂所

楚歷書畫詩後集一

二

作獨多然微嫌尙沿蘇辛格調究匪詞家本色此
外若梁南樵易秋河亦衰然成帙然未算名家若
石華廣文者其嶺外之白石翁玉田生乎所刻桐
華閣集久已爲海內詞人推重顧晚年復多竄改
并益以未刻者十餘闕所謂老去漸於詞律細歟
當爲鏤板行之詩亦清麗芊緜殺後索觀全集其
嗣君經年後始以寄余殘缺已甚然詩筆自儵然
絕俗

雜感

青青陵上松枝葉拂雲起慈鳥巢其間同生八九子日入
相對鳴日出捕蟲豸各各羽翼成骨肉一窠裏一朝隕秋

風眾鳥號不止哀哀夜半啼愁雲壓高壘未盡反哺心
血何時已

迢迢覽眾星繇繇思遠道秋風一夕來螿蛄鳴野草落葉
紛辭柯繁華條枯稿人生非金石浮名累人老努力愛盛
年令德以爲寶

一片古時月今人皆見之可憐今夕酒不共古人持月落
還再返頭白無重繙人生各有業安能日無爲盛年不自
立衰老徒傷悲解脫非所慕神仙不可期

燕尾何涎涎飛集堂前柳不笑主人貧年年傍窗牖世人
輕結納意氣接杯酒相逢歧路間傾蓋擬白首一朝阻艱
難誰復助身手深山松與柏歲寒長相守

田家

楚慶書遺詩後集一

三

陰雨積經旬溝澮長泉脈稂莠日已繁良苗何以植黽勉
事芟鋤草萊行就闕竭力回天年豐亨非坐得好風從東
來秧針吐新碧中情苟無遺劬勞安足惜

春日

山村一夜雨曉來春草生看水出田原觸物皆移情東風
吹桑林午鳩雜亂鳴偶逢鄰叟至依依話春耕鋤耰恐後
時黽勉各有營我亦守先疇努力俟秋成

種菊

山居好種樹身勞心自安况值春雨餘菊苗長青顏晨興
荷鋤來屣勉東籬間藩籬一以修蓬蒿亦就刪顧此宿根

薄灌溉那能閒時時察蟲蟻旦夕相往還但願保晚節不
辭筋力艱行當及秋華一醉方陶然

山中

久與世人疎柴門無剝啄明月靜空林時聞山果落

過聖壽寺

晚鐘出雲林筍幽興不淺躡屐入松蘿隨山十二轉路迴
景屢移不覺迂途遠樵逕見遺薪色籬聞吠犬老僧款門
迎殷勤供茶菴語笑帶烟霞坐臥雜苔蘚深叢宿鳥亂佛
堂擊雲板暮色隱諸峯蒼月照餐飯

早秋

涼風一夜起曉樹已蒼然山川見秋意墟落生寒煙農家

楚庭琴書畫詩後集一

四

飯牛早出耕原上田十畝何濛濛叱犢聲往還卽此足野
趣素心相對閒

鱸潭夜泊有懷荷田竹君

溪雲生晚涼停橈愜幽賞木杪見山家宿火出叢莽夜色
清人心前汀月初上犬吠深林中稍聞人語響忽憶山中
人煙霞夢夢想

秋胡行

菟絲附喬松鴛鴦戲清池結髮既有因形影常相隨妾家
與君鄰門戶連光輝十三學織素十四能裁衣十五善鼓
琴十六解賦詩十七應君聘來上君庭闈貴賤雖異等得
婿身有歸燕婉未終夕奄去忽若遺浮雲逐長風不復留

斯須夫行踰三載賤妾長獨棲孤燈照暗室夜夜頻苦悲
終宵理刀尺鷄鳴具晨炊黽勉事姑嫜切切時恐違陽春
二三月采桑城南時桑葉何青青好鳥鳴高枝感此懷遠
人淚下如縷縻采采不盈筐日昃蠶苦飢客從何方來鞍
馬多容儀中道蒙傾顧黃金托相貽感君區區懷斂容前
致辭夫行踰三載賤妾長獨棲菟絲附喬松死生終不移
鴛鴦雖獨宿豈隨黃鵠飛迴首復采桑攀條常恐遲白日
下空林執筐城南回老姑候門迎相對多歡怡兒行踰三
載幸復歸庭幃妾心如懸旌搖搖驚且疑入門一相見中
腸爲之摧堂前有老烏旦夕哺其兒旣念羽翼成復念得
雄雌一朝秋風起東西生別離雄飛戀新巢雌隕沈江湄

老烏啼啞啞日暮當誰依

楚塵著舊詩集一

五

合懽詞贈葉曦初

輪

白玉爲佩環持以贈君子宛轉衣帶間迴環無終始
兩身爲一心百年記今日文絲織羅綺纏緜自成匹

山莊卽事

白雲深處古田家穀雨新晴課種麻我亦芒鞋閒不得滿
山開遍碧桐花

畱別

銀燈小話亦前緣鬢影花香絕可憐欲別未能畱不得西
風殘月奈何天

片時萍水太盤桓對面翻愁見面難唱到陽關第三疊滿

江蘆雪不勝寒

舟次萬安逢鄰人口號

白頭終日望平安况復風波道路難勞汝還家憑寄語行人已過萬重灘

憶樹兒

惻惻復惻惻憶我嬌兒癡去年臘雪晴是我離家時雞鳴戒僮僕行李羅參差眼看對面人頃刻分天涯阿母抱汝來哽語汝未知阿舅扶汝來繞階頻戲嬉但愛弄山果不解牽征衣人生豈無情雌伏良非宜好語各相慰有淚不成揮去者日以遠親者日以違今年雪更寒塞風吹淒淒南鴈望不來平安聞依稀行依曾祖母可能奉杖藜坐依阿翁懷可能將髻髻晨興念汝笑夜寐驚汝啼人有兒女年乃知父母慈感此難爲懷臨風生長噫

丙子生日有懷

井臼晨操作紅燈夜績麻三年歡聚首相對慰貧家憐汝餐頻減愁儂鬢易華那堪當此夕杯酒各天涯
祖母間猶健晨昏果待扶但能勤奉膳差可慰窮途買賦囊仍澀傭書硯已枯故山田二頃偕隱是良圖

廣靈竹枝詞

那負田家老瓦盆醉看滿眼小兒孫一生消受無才福除却耕田不出門

得荷田書

八千里路訊迢迢古寺秋燈破寂寥一種愁聲聽不得隔窗寒雨打芭蕉

青樓曲

有序

廣靈城中有新吏來衣冠客滿坐縱酒談燕若平生懽而故吏如退院僧門子晝臥廡下無覺之者嗟夫今之對酒肉傾肝膽者非故吏客耶是可傷也作青樓曲

誰家遊俠兒軒車駐平康千金買綺筵萬金招名倡燕姬奏琴瑟趙女調笙簧舞鳳與歌鶯宛轉當春陽豔冶非一態耳目不及詳莫愁年十五顧盼多神光捧觴前上壽含笑贈明璫一朝佩君體百年依君旁相知苦不早行樂方未央海枯白石爛誓作雙鴛鴦不見趙公子縱酒此高堂

楚歷著舊詩後集

七

金盡酒杯乾出門獨淒涼故情不得終新歡安可長

大同寒食作寄呈祖母大人

風雨又寒食其如萬里何松楸痛邱壠涕淚隔關河白髮

饔飧減黃泉骨肉多

先伯天與巨川公皆早世壬戌余有北堂之痛今歲庚午正月復聞先叔

父訃那堪傷麥飯老眼一滂沱

秋葉

秋聲太蕭颯一夜客窗聞曉夜寒鴉散林梢瘦幾分關山傷歲暮身世感離羣故侶盟松柏相望阻白雲

寒夜

霜落邊寒勁氊帷燭影沈年華孤客思風雪老親心萬里書難達中宵淚不禁側聞征鴈度聲斷塞垣深

居庸關

萬石蠶叢壯羣山虎氣雄關門跨上谷天險衛燕中破壘
前朝戍盤鵬落日風朔庭久赤子不用一丸封

懷顏湘帆

白雲終日伴吟尊流水空山自一村憶得著書春又老桐
花如雪不開門

題陸春圃

樹英塞上集

竹枝詞譜入篁篻紅燭高寒虎帳秋聽到羈臣齊淚落伊
州殘拍換涼州

集中有伊涼等曲

家山夢斷白雲堆刺骨邊笳徹曉哀今日九重恩似海
孤臣天角放歸來

楚塵舊詩集

八

九日登白雲山望海上白雲

曉來喜聽樵夫語今日重陽不風雨出門一笑雙瞳青海
色山光淨如許我訪白雲雲忽生石根縷縷炊痕輕隨風
蕩漾作波勢似聞萬壑流雲聲此時海上雲亦起曼衍魚
龍幻無比吹上螺青不可攀蓬萊縹緲秋煙裏須臾山海
兩不分千里萬里同一雲空際有人吹玉筴驂鸞彷彿雲
中君大風西來捲如席六合蒼茫去無迹倒挽南溟洗碧
空海山寸寸皆秋色從來過眼如雲煙秦灰漢劫知何年
負郭耕雲自怡悅豈必雞犬皆成仙况今中外無戎馬醉
後某莫不須把四海農夫但望秋雲兮爲霖雨天下

分和宋方孚若南海百詠

藥洲

霸王忽欲求長生磊石湖上為蓬瀛盡種瓊芝與瑤草
 氤花藥春冥冥珠闌四面香為幄爐火自青湖水綠晝長
 時喚美人來曼聲細度游仙曲胡子衣輕愛六銖紫霞丹
 再吹羅襦却將塵事勞仙姥從此官家稱大夫阿誰膝上
 能多記特敕瓊仙領外事六宮內使皆天人免死還聞拜
 恩賜忽報西頭起陣雲干城全倚郭監軍可憐烽火連宮
 禁猶自梅檀顛鬼神浮家幾日勞裝束說與仙人應痛哭
 劉郎下馬作降王樂範乘舟學徐福長編漢主取船十餘艘載金寶妃嬪欲入海樂範盜其船而去

九曜石

楚慶舊遺詩集一

九

九星墜地化為石一夜洞庭湖水赤山海經具區又謂洞庭湖不脛而

走來炎洲竭盡重趺萬民力子城西角瀾為湖水晶宮殿

開仙都啼烏丁當春樹綠九華縮入壺公壺天然九朶芙

蓉瘦時有仙雲出石竇方丈蓬萊在眼前九轉丹成君曼

壽南宮夜燕開金尊火急軍書不敢聞井旁大石忽驚起

眾星北走歸中原孔帖偽漢井旁石自立行百餘步而仆宋史大寶時一夕眾星皆北流有知星者言劉氏

歸宋之兆劉郎一去湖蕭瑟丹爐藥鼎真何益石頭寸寸

苔花斑盡是黎民淚痕碧可憐九點沈荒煙舊時海水今

桑田何似城西五羊石摩挲遺澤三千年

花田

花農家在城西住花田十里迷香霧踏青人上玉鉤斜有

酒惟澆素馨暮素馨生小本田家秀曼爭傳陰麗華忽賜
明珠三十斛粧成推上七香車景陽宮裏時相見芙蓉那
得如人面合與鬢花共小名慣栽蕉葉爲團扇阿儂不願
金爲屋但願花田作湯沐消受氤氳一種香夜深開傍鬢
雲綠博得君王幾度憐由來紫玉易成烟秋墳一片花如
雪不聽哀蟬也黯然香魂冉冉來花鴨地老天荒奈何許
生生不斷有情根只戀劉家一抔土惆悵人間倍愴魂銀
絲金縷又黃昏莫聽尊前歌玉樹故宮遺恨不堪論

陵山

薛王去後襄王死劉陟公然作天子豈意咸陽舊酒徒轉
笑洛州新刺史貂璫二萬從古無平章半屬傾城姝六軍

楚庭香雪遺集

十

士卒秋雲散一代繁華春夢徂降王一去歸不得諸陵烟
樹生愁色東風盡日吹棠梨麥飯無人作寒食北亭今已
犁爲田玉魚金椀出人間讀碑誰下康陵淚成禮尙紀光
天年曝書亭集劉萸墓在番禺縣東二十里北亭崇正丙
子秋土人發其墓一碑一文曰維大有十五年歲次
壬寅四月甲寅朔廿四日丁丑高祖天皇大帝崩於正寢
越光天元年五月癸未朔十四日丙申遷神於康陵禮也
云云從來霸業如飄瓦鑄鐵空教費爐冶宮門荆棘臥銅駝
墓下榛蕪埋石馬况復傷心弔懿陵秋墳零落女冬青生
香不斷膚如雪賸得花田有素馨

琵琶洲

西風蕭蕭江上村荻花瑟瑟悽吟魂若有人兮撥金縷善
才却憶康崑崙此時明月淡於水林皋一片秋烟屯潮痕

激濫沒沙嘴，蟹聲悉索行。蘆根十丈黃，塵倏飛起平。沙斷
鴈哀離羣，有若涼州翻。入破四絃淒，緊愁鳥孫憶。昔天寒
出關塞，檀槽玉撥圍。清尊胡姬十五雛，鬢綠邊聲訴。盡王
明君南歸，九月渡江晚。滄陽獨夜聞啼猿，人生過眼總陳
迹。何異雪爪鴻留痕，香山不作段師死。中年哀樂將誰論
今夕紅燈太蕭索，憑仗酒力回春溫。酒醒還聞塔鈴語，蓬
窗一角來朝暾。

媚川都

劉王大醉龍王愁，欲將海底窮冥搜。珠池寶氣人早識，往
往蜃市圍重樓。魚服健兒足繩石，直下沈淵五百尺。千人
性命懸一絲，蹈危况與蛟龍敵。蛟龍怒起波濤翻，海天冥

楚慶雲遺詩後集

十一

冥白日寒，驪珠徑寸不可得。轉令骨肉悲生，還欲乞王憐。
王不應，飛符又下，催輸令進奉深宮。十斛珠斷送窮簷，萬
家命聞道驕王方。宴歡黃金作屋珠，爲闌願化鮫人爲君
泣。便令頃刻堆千盤，無端鐵騎驚春夢。阿房一炬真堪痛，
玉庫淒涼埽劫灰。尙有殘珠四十囊，降王智巧殊可憐。戲
龍結束爲鞍韉，尙方匠作皆驚伏。博得官家百萬錢，喧傳
下詔珠池改還家。幸有妻孥在老蚌，安然夜抱珠始覺。君
恩寬似海。

送宮保芸臺師移節滇黔

太歲在丙戌，六月當下旬。父老走相告，九衢同一塵。但云
宮保去，氣結不得伸。移節七千里，攀轅三萬人。諸生或隕

涕賤子尤感恩填胸千萬言一一難具陳

公來如昨日公去剛十年重洋靜波濤五管無烽烟蒼頭億萬戶豐歲多歡顏仰事與俯畜健飯仍安眠來時小兒女去時皆及肩從今感遺愛孝弟長力田

憶昨走鯨波蔽海千颿黑受降築新壘善後鮮良策炎風煽餘燼內河復荆棘公來急勦捕滅此乃朝食頗聞估客語驚定念疇昔水邨無夜警秋蘆自深碧

嶺海徵文獻戴志開其初泰泉著作才典雅洵有餘後來劉與郝考証亦云疎况今凡百年沿革日以殊叢編聚烟海稗史芟荒蕪今日論圖經此冊真完書廣東通志凡五最善師撰廣東通志凡二百三十四卷取裁博雅藹與分撰皆承師訓云

楚屠舊書後集

三

城北越王山一角如蓬萊上有紅棉花下照讀書臺學海紹前哲袞袞羅羣材實事求訓詁至理能兼該性命落空談一掃如浮埃努力奉師承庶以詔將來師闕學海堂以博篤之學教人臨別復爲籌畫經費歲逾千金以爲諸生膏火命藹與趙均林伯桐會鈞徐榮熊景星吳應達馬福安爲學長以治其

事
今人愛八家哄然詆六代庸知宋齊人專經重流派講談

唐義疏江河不可廢即使論文筆淵奧窮萬態鄴生注水

經莊老見襟帶從教破畦畦耳食以爲戒師嘗謂昌黎文起八代之衰此

語頗誤後學不獨唐代義疏皆取資宋齊人卽以文筆論水經注一書斷非柳子厚諸人所能作也

皇朝盛經學著書各充棟遺詮守漢魏精義述齊宋鄉壁

戒虛造而况滋聚訟吾師仿說郢羣言務兼綜古麻證堯

典今釋注禹貢此事當千秋何止萬人誦師仿陶九成說

經解一書洵經訓之淵海也蘭與編校及監刻之役

公來得經師公去戀慈母前夜山堂月今日江亭酒師於五月

望夜攜公子賜卿招何相文張棠村兩太守劉樸石編修謝里甫庶常何藜閣司馬趙平垣學博與蘭在學海堂賞

月今再見圓而師移節耳亦知遮道難轉冀當筵久纂纂別離支依依

送楊柳前程千里心遺愛萬人口但願公復來日夕望南

斗

孤兒行

誰家蓬頭兒履霜赤兩足問之輒涕泣但云兒命促昔依父母時兄弟雙明玉懷中抱兒乳膝前餞兒肉晝熱常分瓜夜寒每共禡同得父母憐時時省寒燠一朝失怙恃天地痛翻覆兒大乃有嫂兒孤不如僕嚴霜天北風草枯兒出牧汝牛慎勿瘦含淚向牛囑兒瘦尚可支牛瘦當受撲忍凍日晡歸枯腸索冷粥抱哀訴兒嫂欲言膽已縮同氣不見懷况嫂是他族不惜兒身苦敢怨兒嫂酷傷心只恐九原知孤兒哭時父母哭

楚庭舊詩集

圭

子夜歌

銅鏡明月光與郎作照面不是秦宮寶郎心安可見陽春二三月桃李媚春陽豈不望君憐不解時世粧旦暮窺郎心常疑異疇昔妾身同女蘿妾心似松柏

寄竹君姪

風塵百事與心違况復龍堆鴈訊稀六月荔枝三月笋故

山那得不思歸

題竹航大令畫小冊

十畝原上田一雨足春水古木下寒鴉人耕夕陽裏
春樹起寒烟春湖添尺許湖上打魚人濛濛一蓑雨

夢歸

風雪歲云暮客夢歸庭闈入門動譁然一家情依依上堂
拜祖母白頭扶杖藜相見慰老懷百感填肝脾喃喃問關
山切切念久離撫我面顏瘦不覺雙淚垂阿父啟祖母老
人且勿悲兒行慮風霜兒歸免憂思絮絮相勸止強顏對
歡怡諸兒訊行李諸弟索棗梨嬌兒伏翁懷側目久相窺
軟語招之前欲行心尙疑山妻立屏間百心艱一辭聞我

楚庵舊遺詩集一

古

說風塵顏色黯以懷祖母恐語多屢問中腸饑回頭見叔
母未言先涕洟汝叔已黃泉客中知未知含淚啟叔母奈
此災禍罹入春甫四月痛絕聞訃時叔母指諸孤伶仃傷
幼癡落日出門去尙望阿父歸我聞心斷絕轉復痛母慈
欲語輒哽噎嗒然神已迷街柝一聲警擁被仍天涯起視
窗未白殘燈冷無輝翻恨醒倉猝未及盡衷私獨坐呼僮
僕夢語答支明

花面伶歌

有序

壬申客惠州有花面伶者善舞薛輿菴軍門賜食而泣軍
門憐之欲爲落籍劉心香夫子命作歌紀其事

花面伶年十五回鶻裝伊州舞一曲高歌有鬼神聲淚無

人識傾吐將軍開筵徵菊部十丈瓊瑜奏簫鼓花伶一出
神淋漓孽子孤臣憑腸肚是時神奪四筵悄虎帳牙高日
光午將軍曰吁賜伊舖花伶當食淚如雨將軍問伶長跪
謝將軍小人有母得食兒甘母飢心苦將軍曰吁慎勿苦
明日百金當贖汝使汝白頭人得受烏兒哺君不見漆身
塗炭改面皮古來烈士真肝腑

題姚玉如小影爲周南卿三變賦

錄二

不關心處最關心背面時常淚滿襟一自周郎親教曲累
人名遍馬蘭箴

馬蘭箴時
錢唐名妓

會把沈香日幾薰銀篋小幅寫湘雲長長棖觸年時病春
瘦三分幘二分

楚塵舊集後集一

五

娛江亭夜集

錄一

關干如水夜迢迢冷到蕉衫酒半消明月呢人遲不去紫
薇花下照吹簫

招同徐鐵孫

榮

黎星初

炳奎

曾勉士

劉呂小伊

玉璜

黃石谿

子高

諸博士雅集酒樓卽送鐵孫之官藁

城

高樓殘柳不勝鴉付與詞人看落霞但得身閒如野鶴不
妨官冷似梅花名山合訂千秋業薄宦猶乘萬里槎各有

襟期須努力布帆開處卽天涯

時擬訂學海堂同人著錄刻爲叢書

誰並詩名伯仲間旗亭休更賭雙鬟二分明月憐吹簫一

路梅花送出山憶我著書畱草屋儘人看竹到柴關

余官信宜

訓導時有句云不妨佳客而今却借西園住笑比閒官分
來看竹如此閒官好著書

外開
同翁遂菴學使玉山探梅

石橋西去絕塵氛纔到城根香已聞幾處林梢疑有雪滿
天花氣欲爲雲尊前莫放人千里笛裏頻留月二分他日
玉山重結社只應猿鶴最思君

題桃花燕子小幅

呢喃聲裏夕陽斜只愛尋常百姓家看取巢痕無恙在滿
池春水滿牆花

風流誰復問南朝會過秦淮舊板橋燕子不歸花落盡一
簾寒食雨瀟瀟

楚慶舊詩後集一

六

送翁遂菴學使秩滿入都 錄三

九曜荒涼水一池何人別薛讀殘碑來尋米老熙寧石重
和蘇齋丙戌詩

乾隆丙戌覃溪先生搜米元章詩刻不可得賦詩志憾道光丙戌冬先生于榕根得之刻石

榕葉聲中懷舊雨蓮花香裏拜新祠

時於池北立景濂堂供濂

溪先生像關心亦有鐫苔字此後憑誰好護持

我本前因是蠹魚寒灰孤負力吹嘘忍教白水重違約欲
買青山老著書

今歲訓導俸滿先生欲加薦舉力辭乃止千樹荔枝圍草屋十
年塵夢別吾廬卽今腰板隨人立自笑平生計已疏

越王山下讀書臺會奉先生上壽杯玉笛送將千里別梅

花吟到幾分開匡劉自昔傳經學班馬如今作史才他日

長編三百卷可能鈔寫寄南來

先生嘗謂近事須訪李燾爲長編云

題趙飛燕印拓本後

玉印徑寸厚五分潔白如脂細作飛燕形文曰婕妤委趙四字

篆似秦璽獨趙字以鳥跡寓名嘉靖間藏嚴分宜家後歸項墨林又歸錫山華氏及李竹嬾家最後嘉興文後山得之仁和龔定菴舍人以朱竹垞所藏宋拓婁壽碑相易益以朱提五百遂歸龔氏此冊乃何夢華所拓也

碧海雕搜出漢宮迴環小篆亦尤工承恩可似綢繆印親

蘸香泥押臂紅

不將名字刻茗華體製依然復內家一自宮門哀燕燕可

憐孤負玉無瑕

黃門詔記未全誣小印斜封記得無回首故宮應懊悔再

休重問赫蹄書

錦裏檀薰又幾時摩挲尤物不勝思烟雲過眼都成錄轉

楚歷舊壽集一

七

憶龔家婁壽碑

賞雨茅屋詩應宮保厚山夫子教

道光庚寅春暮久旱得雨夫子於撫署東園疏竹補籬編

茅結屋欲以驗雨澤知穡事也命蘭賦之

嫩寒天氣尙氤氳到處蛙聒耳聞茅屋支開窗四面芭

籬梳減竹三分關心舊雨還今雨愛看山雲似水雲見說

低田深一尺萬家臺笠事耕耘

頗聞薺藿盡登盤田坼水文井欲乾絕島須教通市舶重

關休更阻監官

道光四年阮宮保師奏准各國米船免輸船鈔仍准載貨出口照例收稅由是米船

歲至民食賴之近來由來樂歲綢繆易真覺荒年撫字難關吏需索來者少矣

連夜雨聲聽不斷知公蔬飯一加餐

會隨杖履一經過古壁垂垂長薜蘿果熟漸聞禽語密荷
深常覺雨聲多但令人有耕田樂誰道今無擊壤歌看取
秋來香米熟都拌社日醉婆娑

幾折疏籬宛轉通古時苔石尙玲瓏竹無畫意猶嫌俗亭
有詩情便不同燕語頻來紅雨外鳩聲時在綠雲中

第一首雲

字三首多字與此聯
大子命摘書於楹間
俗以刺桐花
多爲早占

有畫老杜暫醉佳人錦瑟旁詩意索題者得二絕句

哀絲何處弔湘靈曾近紅兒座右聽榷燭夜闌星欲墮
衫涼透酒都醒

根觸眉痕倍黯然雲和低訴月娟娟冬郎易老秋娘嫁一

別臺城二十年

海州廣文歌

天吳夜走金堤決海州城中水五尺浮家但苦滄溟寬投
足真疑天地窄見說城門開廣文來不來萬竈沈無烟只
有飢鴻哀忽報廣文來頓覺風波定分給官倉十斛米已
博窮黎萬家命憶昔驕陽燦千畝民賑一升官一斗但願
廣文來莫交胥吏手水落萬民蘇雞犬歸田廬婦女種黍
兒讀書共說廣文來教民如教子徹夜東西坊書聲滿人
耳八月桂花香飛上雙蝴蝶路人都識讀書好比鄰已
泥金帖君不見芙蓉城關花繽紛舊時手種今如雲已

石室談經地來祀當年翁廣文

楚庭耆舊遺詩後集一

十九

楚庭耆舊遺詩後集一

譚瑩玉生校

南海伍崇曜紫垣緝

顏斯總

字詒銓一字君猷南海人嘉慶庚午順天舉人著有聽秋草堂詩鈔 陳仲卿云君懷文抱質忘貧去吝方之古人有黃叔度張思曼阮士宗之風雖事業無傳而風流不可沒也又云廁身簪裾之內寄意雲霞之表榮利不櫻其懷泉石常窺其志可謂清高者矣私諡曰和貞 譚玉生云君猷孝廉少日以白杜鵑花詩得名後抵都門以夕陽殘後猶隨柁春水高時欲上帆之句爲張船山太守所

楚庭耆舊遺詩後集二

一

賞因留問業焉遺詩不多句如獨開生面無前輩不厭傷心近古人一選深陰疑釀墨故園風雨欲肥梅長物尙留黃卷在生涯依舊短檠中家園有夢輸君到風雨無情不自聊禁盡酒詩仍有債學來書劍總無成別人深悔辭家易久住方知作客難綠水簾櫳曾過夏黃花門館最宜秋妻子易爲寒士累名山多負少年心雖雅近劍南却非株守老船家法善記錄於學無所不通著有兩窗漫筆國朝語林嘗言抵都時曾遇異人決其年不永授以藥謂定數難逃或冀可解脫云迨歲壬午疾作檢其藥則久亡之矣遽卒然集中詣日者推命

作云但恐工劊刻不可知者壽則固自知之而自
言之矣

閉門

人事將焉極吾生合閉門觀微心有得索句道非尊慮向
閒中絕交從淡裏存倘逢息機叟相對各忘言

夜雨在樹庵作

讀書來蕭寺擁絮眠山中忽聞屋瓦聲知雨疑是風因此
不成寐百感來相攻痛逝行自念古人諒我同明朝望平
原平原正濛濛

白杜鵑花

羈魂一夜泣無血千山萬山慘飛雪知有春風鷲地來走
上枝頭連夜發臨風開落愁誰語月冷烟橫迷處處一時
忘挂護花鈴恐逐鬼車歸蜀去

寄仲卿

不見陳遵已浹旬菜花居裏苦吟身獨開生面無前輩不
厭傷心近古人佳日雖多宜買醉閒愁如此合拋春慚予
潦倒棲山寺前路茫茫尙昧津

久雨

一月門常閉兼旬病屢侵眠遲宜夜短雨久覺春深鼠有
窺人意鳩忘喚婦心坐令佳日去上已罷登臨

殘春

竟日無人款戶來柴門行處長莓苔事如短夢醒難憶花

到殘春賞不開一徑深陰疑釀墨小園風雨欲肥梅料量
此際何消遣好待提壺買酒回

書燈

憐爾光能永相依到夜闌請看牆角棄應忘屋頭寒聽雨
挑仍暗聞鷄起已殘豈無人鑿壁握卷意難安

詩卷

不解緣何事年年爲爾懼用原憑我法派合躡時趨少作
終應惜幽懷得自娛倘無名念在流布亦何須

移居光孝寺寄陳仲卿

久將雲水擬行蹤小住招提百慮空長物尙餘黃卷在生
涯依舊短檠中神仙字已三番食

今歲居樹庵遷葉花居至是凡三徙彌勒

楚庭著舊詩後集二

三

龔眞此日同忽憶仲翔知已語思君迢遞遣詩筒

寺爲虞仲翔故

苑

詣日者推命作

忽作無聊思都緣百不偶聞有賣卜人命理求細剖覩縷
計支干附會說休咎談言雖微中問十遺八九聽姑受以
頷譽遂不容口平生慕功名進退不欲苟一萌僥倖心反
覺迂順受升沈理早定富貴吾自有但恐工劊刻不可知
者壽歸來掩關坐引滿杯中酒

錄別四首

旣冠學無成飄然萬里去隨身祇長缺稅駕在何處上堂
拜慈親淚落忍還住兄弟三四人意厚詞自絮我時對以

臆舛錯難成句拜畢便出門出門猶反顧

行行至花田中有送客亭此地慣離別柳條臨水青不遠

勞友生

梁二子春

在原感脊令

三兄弟

主人設壺餐要我且暫停

舉杯勸客飲鄭重復丁寧但我心已醉兀兀何時醒

周姊夫卓

夫爲置酒道根園

飲罷復登舟諸昆亦繼至人生會有別戀此竟何意老親
年已邁承歡須養志有方咎或輕遠遊內滋愧同是作人
子行役嗟予季他日對牀眠聊灑臨歧淚

須臾擊銅鉦篙師起乘潮烟舍來歷歷城郭去迢迢回頭
望珠江驚濤起寒颺關吏見船來闐然舉手招下船氣橫
溢行篋悉動搖顧我何所有詩書送無聊關吏笑言去解

纜風蕭蕭

清遠舟中

起望遙天半蔚藍離愁如草不勝芟夕陽殘後猶隨柁春
水高時欲上帆路近好山勞應接身從人海悟仙凡同袍
惜別殷勤甚舊酒痕今在故衫

中宿峽

羣峭亘青空疑是洪荒鐵陰陽炭鎔鑄險乃造物設峯巒
旣蜿蜒波浪極清冽初訝山水複旋覺天地別峩然門洞
開倏忽路阻絕蒲帆正飽風十里須一瞥凜茲紆迴勢天
功貪不屑推篷喜目縱握管愁語拙因此悟文章豈能無
曲折

大廟峽

出峽復入峽看山難登山突兀何神廟黯淡游子顏篙師
刺船來劃破綠幾灣綠破那足惜逝者何時還一一辨名
號重重擁髻鬢劊削出鬼斧昏黑羅神姦行吟復臥觀盡
日了不開廢卷三歎息逝將同石頑

夜泊瀆陽峽

羣力瘁終朝到峽忽已夜我獨怪風姨慳此一帆借前邁
鼉鼉驕深入猿獠訝嵐氣上衣襟月色射巖罅近復有村
氓絕壁事耕稼甘心逐魑魅結隊招姻婭彼獨非人子謀
食計不暇嗟我亦無田聊向江神謝

湘江夜泛偶作

湘水無波鏡面平臥聽柔艫夢難成多情只有娟娟月照
著天涯分外明

得順風過洞庭日行三百餘里

破浪得南風客懷暢所欲不知去帆駛反訝來舟速混茫
接水天滅沒見陵谷數峯昔日青張樂當年曲境快轉疑
夢途坦無須哭篙師起鳴鉦神雅飛啄肉

踏車謠過漢川作

前河流水聲澌澌平疇禾苗青猗猗今年無雨踏龍骨海
底老龍眠未知黃犢如母長相將來就柳陰涼草芽滿地
搖尾食背上饑雅飛啄瘡傳家受地百畝足高處種麥低
種穀穀收作米飽高年麥熟賣錢修破屋君不見賈胡

帆日日向江湖朝不見父母暮不見妻孥及時不耕胡爲乎西鄰去歲逋官租吏人如水來追呼耕牛鷄犬亦將去至今田地尚荒蕪及時不耕胡爲乎

咏轅下駒二絕句

誰從羣裏辨驂駟僕僕風塵幾日休憐爾不羈心性在牽來轅下也低頭

素日原輕萬里程畜同凡馬定悲鳴無多芻豆前途遠縱有長鞭不肯行

大梁旅店題壁二絕句

疲驢破帽人誰識冷炙殘杯自昔聞豪舉平原空好士買絲思繡信陵君

欲訪夷門跡已湮昔賢多少困風塵停車徑就屠沽飲意在侯生一輩人

寄陳孝廉大經

八千里外各萍飄又向燕臺慰寂寥相送歧途同氣短思量別味尚魂銷家園有夢輸君到風雨無情不自聊近作閉門高臥客聞鷄空負可憐宵

落魄一首寄里中諸子

年來落魄滯燕京只憶貧交不世情禁盡酒詩仍有債學來書劍總無成秋因作客聽偏苦夜爲懷人坐到明可笑未謀田二頃也思從此說歸耕

八月九日出都口占

一路西風送馬鞍春明門外柳初殘別人深悔辭家易久
住方知作客難良友殷勤思贈策謂羅煒亭譚蓋臣輩師門珍重勸
加餐萬子雨夫子三年塵土衣裳敝還我依然范叔寒

過趙北口

卅里長堤去路遙沿堤垂柳望秋凋客緣離緒愁千疊車
趁清陰行一宵流水斷橋勞目送曉風殘月覺魂搖宿醒
漸解鷄聲起少壯雄心也易消

兗州道中

行抵齊南魯北程心先隨雁向南征秋聲蕭瑟全歸樹落
日句留半在城近古民風仍朴魯前途山勢似逢迎塵中
久亦汚顏色欲向河流一濯纓

楚庵著舊詩後集二

七

春堂藏書圖詩爲梁子春作

少小論交稔子賢最憐勤學慰三遷多藏書亦能爲累愛
日天偏不假年慈母劬勞分甲乙鮮民哀慕當杯棬前時
曾記登堂拜今我披圖也泫然

輓陳孝廉大經

秋雨秋風裏驚心矣故知憑棺猶有母齋恨竟無兒寂寞
門前弔飄零死後詩何須論壽夭天道本堪疑

京華淹旅食爾我兩浮萍別速杯頻把談深雨共聽國門
迎送柳驛路短長亭都是黃墟畔難爲他日經

君臣冢并序

冢在廣州城北門外流花橋野田中唐王聿錡與大學士

蘇觀生死後合葬處也有鍾老人者爲子言近有耕民誤墾其冢旁地忽風雨大作懼而中止遺址至今尙存予嘗往來其地作詩弔焉

贛汀不守南都變紛紛監國聊乘便端州才立永明王廣州又作唐王殿

行宮以都司署爲之

唐王初自七閩歸弟及兄終未

盡非紹武改元時倉猝蘇何舊傳位峩巍位高望淺才仍下誰是經邦救時者糧餉還思寇盜齋衣冠暫向優伶假門戶依然滿外庭何辜鄰使竟遭刑操戈尙自攻同室急難憑誰誦脊令徒聞勁旅云安集不知勢已成孤立惠潮盼得報書來東門眼見天兵入殘局支持劇苦辛止將談笑靖風塵傷心哀怨成千古瑣尾君臣僅四句縋城追

楚歷舊遺詩後集二

八

獲誠天意相從一死知非畏不作牽羊銜璧人可憐玉葉金枝貴遺跡行人重歎吁當時葬處亦荒蕪北亭竟發劉王冢厓海終沈趙氏孤天亡運改非無故胡爲尙有風雷護宜城茅屋祭昭王燕齊立社祠樂布野史興亡話老翁歲時腹臘走兒童魂歸別有無窮恨南北諸陵蔓草中

四思咏

并序

口碑未泯故謳思三公表彰循吏繼之以楊太守庶幾風人咏勿翦鄭人歌誰嗣之意焉

巡撫南豐李恭毅公

清時吏失職諱盜劫乃頻公稟肅殺氣來活嶺外民沙菱昔萑蒲羣小固藏身官來颺已遠吏至情逾親掩捕餘情

子憑依皆富民公退齋戒思遂廉得其真獄成必盡殺判
決疑有神驕子不早制流蕩誰能馴養奸竟何益姑息信
婦仁嗚呼鄭子產宜其稱惠人

尚書會稽陳公大文

嶺南信仕國富名映天壤只期通又通時選人有通又
通選廣東之語

計枉不枉陳公甫下車誓不貪吏兩彈劾無遺力發摘若
指掌閭閻稍蘇息僚屬常悒悒公乃喜揪髯貪污盡一網
逮乎移山東泣送集少長予實竹馬童隨眾遂瞻仰心似
春風仁貌得秋氣爽年來東山臥曷慰蒼生想

總兵香山黃公標

將軍出虎門游泳大海水天性好殺賊書紀姓名耳洋匪

楚歷著舊書後集二

九

思吾粵官兵實表裏將軍痛懲艾勦捕無寧暑揚帆估客
樂奏報天顏喜前年追窮寇掃滅勢可恃軍門養威望
賊遁一何駛悠悠吏議望怏怏抱疾始肅清竟無期嗚呼
遂不起可憐七尺軀乃向枕前死

知府建水楊公楷

太守少任挾望是千夫雄低首作文吏小心事上公羣小
昔不靖奉檄會從戎花翎出天賜凜凜生英風佛山大
都會循聲萬口同扁舟將入覲舊治聊推篷村民適報
賽驚喜迎舟中籃輿遍墟落香燭拜兒童人山復人海序
進無初終解帶歸去來誰知廉吏窮

貧閨四詠

識字

一卷女孝經聰明以有託字奇從弟問志苦憑娘誑偏傍
假借讀授受諧聲錯不羨女多才多才多命薄

刺繡

朝繡蛛蝶裙暮繡鴛鴦被花樣出心裁春風生腕底斬新
觸未忍飛動看逾喜辛苦爲誰人持與豪家子

梳頭

散髮對膏沐動覺傷懷抱昏鏡慣欺人一拭一回惱縮就
力已微粧成天尙早努力學趨時不及城中好

戴花

雜花滿籬落插鬢聊隨分整整復斜斜欲問無人問出從

楚塵舊遺詩後集二

十

池畔照忽覩天然韻杯水養餘花屈指遊春近

題陳仲卿搔首圖

夫君憂患出天性弱冠痛醉讀離騷君有讀離騷圖云何奇氣吐

不盡搔首欲同青天高昂藏野鶴鷄羣立厯塊駿馬鹽車

號目空一世仙下謫曾有萬卷人中豪圖時二十今三十

空驚歲月無情急飯顛相逢玉貌非茶烟回首青衫溼文

章未食纖毫報鬼神空向千篇泣攬鏡頭顱尙可爲讓人

少壯何嗟及珠江春水碧如油春光明媚春風柔飄然典

卻鷓鴣裘含笑可上如花舟寧向青樓羸薄倖勿輕長鍊

千諸侯勸君及早杼懷抱再過十年人更老

讀書萬壽庵書懷二首

九年不到西郊寺清夜時時憶昔遊綠水簾櫳會過夏黃
花門館最宜秋酒徒別久頻勞夢鄧秀才鑿中寓此最久獨客詩成

始欲愁予悼亡時來遊最數說與僧雛渾忘卻自憐身世亦浮漚

襪被攜書賦入林雪泥前事尚堪尋荷溪地名月上邀僧步

松逕在龍津橋之西風來愛獨吟妻子易爲寒士累名山多負少

年心故吾略向今宵證坐聽更樓鼓欲沈此地有上更樓汎

戲論嶺南 國朝人詩絕句十六首

交廣從來是楚鄉湘壘苗裔擅詞章頑民不頌周家聖手

掬寒泉弔首陽

獨漉山人字字真閒雲野鶴自由身見贈王漁洋詩篇終時露傷

心語慟哭西臺宋逸民

楚庵舊遺書集二

十一

領解才名三十秋租船詠史劇風流朱查聯句雄壇坵得

入承明盡白頭

海日堂詩自足傳不關推轂有諸賢一麾晚出南荒守日

薄虞淵亦可憐

蝴蝶花開蝴蝶飛伍瑞隆鐵山句僅傳音節竹枝遺王邦畿說作陳子

喬生枉自稱詩老才盡漁洋感舊詩二家集除感舊集所選外亦少卓卓可傳者

才力焉能繼數公災梨禍棗古今同自箋詩語吳山帶不

滿他人一笑中

七子聯翩應制科雍正丙辰詔舉鴻博生才方訝此時多聊將鴻

博誇詩藝奈爾車騰芳曹愷數子何

蘇耳羅天尺高足惠門中理學胡方語稍精工最負時名何

刺史西池憐他都是應聲蟲

詩道榛蕪數十年月泉吟社談時賢惡詩多少人傳誦絕

倒黃同石一編所著戰古堂集類多尖巧小題初出時一時紙貴

百年應是中興時重見馮生正始追錢籊石云嶺南詩自曲江後皆存偏方之

音惟馮生力追正始手寫長篇鐫五岳一時傳遍六州兒魚山改官

米店雞題亦擅場檀萃云當時詩社有以此命題者其警句云塵世功名一夢中爾時派類如此

家家社飲門篇章起衰若問推陳涉一卷新詩仿盛唐亦胡

常崛起西蠻自得師二樵三絕畫書詩開篇學杜西歸作便

是唐臨晉帖時

於物多藏仍是累與人同患得無情張葍房整理落水書畫句雅人深

楚庭舊遺詩後集二

七

致和平語不枉才高四傑名李南澗有張黃黎呂之目

仙吏人推李載圖符清名流海內縞荆存朝吟暮刻安陽

令趙渭川常以不及梅州葉解元葉石亭鈞嘗為直隸

撥開雞屋稱前世浸過瓜棚勝舊年呂石帆詠大雨詩野逸阿堅

原本色好攀楊林共隨肩

勿笑吹毛議論新昌黎蟬噪等梁陳能招後輩雌黃口一

代傳來有幾人

楚庭耆舊遺詩後集二

譚瑩玉生校

南海伍崇曜紫垣緝

張思齊

字賢仲一字無山順德人優貢生官鑲紅旗教習
著有吟秋館詩鈔 譚玉生云阮儀徵師相葯房
太史同年友也督粵十年闕學海堂校士粵中諸
名士各以所業請而君寂不聞也殆意興蕭然矣
詩才明麗在小李杜之間以繼迷虛閣集亦如斜
川之於老坡

茶村詩話無山教習爲葯房先生仲子出嗣玉洲
孝廉與其兄楨伯明經詞賦一家翩翩競爽善畫

楚庭耆舊詩後集三

一

梅夙耽吟詠久困場屋以貢優之京寓桂香東侍
郎家數載葯房先生同年也旣鬱鬱不得志南歸
後益以聲伎自娛故集中喜作緣情綺靡之語然
五言如善恨須拌酒多才莫近名暮天聞水碓斜
日掩柴關傍水尋僧寺逢人問酒家薄雲常漏月
小雨便疑秋城郭剛臨水人家半住樓雨氣平低
野雲光忽入城七言如玉符自有潛夫論孟檠甯
無本事詩古寺無人狐拜月暮潮掩碧客悲秋魚
焚夜深聞上界塔鈴風緊語諸天碎金世許同安
石殘稿誰還問茂陵蒼茫樹色分吳越悲壯潮聲
自古今柳色暗遮湖裏外花香不辨陌西東文章

有道思知遇負荷無能愧老成沿途柳色渾將雨
拍水雲陰欲化烟猶具見先輩典型正不得謂如
君家司空頗恨兒女情多風雲氣少楨伯亦能詩
館余家萬松園最久今先後同歸道山遺稿散佚
並版門書屋藏書俱不可問矣

雜詩十四首

錄三

有客來荆門貽我焦桐琴非惟寄幽思藉以傳素心素心
渺何所遠在春江溇春江烟水柔誰識絃外音明月照羅
幌美人來暮岑感我意纏綿投我碧玉簪銘激不能報愧
乏雙南金

邢尹一相見各自歎不如使非各盡美焉能中若虛恆情
不知量一得輒趨趨自謂世無偶寧知猶守株大巧必若
拙大智必若愚中乾而外彊貽笑蹄涔魚

東髮爲君婦恩情銘骨膈君心自仁厚讒慝苦搜摘睽絕
難自陳天牢鎖冤魄妾有鴛鴦襦中銜八寶珠含愁久不
御光燄知存無我躬旣不閱何意較錙銖近懷汨沒憂恐
復終泥塗不忍韞櫝藏將求善價沽

七夕

嫋嫋西風夜暗吹含情偷捲蕙香幃人間那有銀河隔如
此良宵不早歸

卽事

纔入新年仍舊病病時風雨最傷神夜來棖觸淅淅約渾

似秋堂少睡人

寄蔓娘

秋燈欲爇月如銀何處鷓絃上曲新怪我青衫憔悴極與卿同是不如人

紫雲孃最解憐才樂府頻歌起夜來愁擾鬢絲秋絮夢一時幽恨黯難開

永安巫

鬼能病人鬼可拘主人病鬼走召巫病根始以雞卵辨繼乃鳴鑼吹角聲鳴鳴堂前跳躍神以降三呼神號其來乎神也最靈病者無辜鬼而爲虐鬼其可誅花竿亂舞如仙姝贖魂破胎何其愚竟刳臂血塗丹符白牒黃誥申上都誰其見者誰聞諸病者已愈死者蘇吁嗟乎病者已愈死者蘇雖欲不信良非誣

花朝約春湖過挹芳園遇雨不果

春色真無賴花時雨更多紅顏原薄命幽怨竟如何悵望珠江水歡場似夢過余懷渺難寄蹤跡又蹉跎

夜起

晨星欲落夜漫漫遠寺鐘聲聽漸殘半畝湖烟一林月有人消受五更寒

十二月十九日東坡先生生日墨卿太守招同宋芷

灣吉士陰青原上舍陳仲卿家南山集寒玉齋設

祀

景祐三年月在丑星精下墮眉山陽耀芒動角不化石盤
結習次成文章雄才變眩詎易測當時直軼歐與黃却憐
命宮困磨蝟老復遷徙來瘴鄉雞蟲得失顧何定慷慨不
易惟剛腸于今緬想玉局觀凌雲壽骨還相望惟天有斗
人信常啜波揖險心遙將精神縱隔八百載恍爾笠屐來
洋洋堂前屏息各舒拜一瓣共獻沈水香天寒風峭尊酒
綠梅花隱隱窺鄰牆鶴南飛曲不敢奏愧我審律忘宮商
欲向伊川買修竹繪公杖履于其旁茆堂照水月在牖處
置六鑿心悠揚才高或致百物妒室遠豈畏羣兒傷人心
千古有公論出處詎便關行藏况聞德望在霄漢我輩空
復懷助勳合江樓與招隱堂慙劫不朽精靈長日斜迴望
烟荒涼野鶻盤空相頡頏何時穩權來上方更欲再獻流

楚屠舊遺詩集三

四

霞觴

夢芭堂

錄一

日落江雲紅離披逗江樹悵望天一涯忽迷夢時路起立
生然疑愁心向誰訴音問久不悉傳聞復多誤握手良因
循悔未詢近故連朝春雨霽花落忽春暮君來不可知君
去隔烟霧緬維平生歡精神或常注開我東閣門誦我懷
人句風寒羽翼薄跋涉恐難履月色殊多情照人抱幽素

寄懷鄭景曜兼東周竹軒

錄一

我愛周夫子清才似謝安近聞都偃蹇奚以慰艱難

竹軒近不

如意且有悼亡之憂客未判愁詠春還當夢看憑君遙問訊何日共

槃桓

閏二月十二日梁若林蔡季材石簡齋石岐山繼堂

叔同集版門書屋小飲席上分賦

錄一

酒闌何處忽聞歌屢向花前喚奈何今日留題君輩在他
時回首夕陽多牆陰樹暖飛蝴蝶欄曲烟深隱薜蘿醉後
莫辭更斟酌春風前度已蹉跎

竹西樓感舊寄簡永菴

錄二

長齋繡佛竟如何消息茫茫感逝波惆悵燕臺少年叔重
來空唱柳枝歌

香銷寶篆夜沈沈小妹依稀識妙林閒向水天談往事亂
雲不似客愁深

楚庭舊詩集三

五

聞林竹嶼計

一第真如夢書來竟自癡可憐成死別尚說偶歸遲經學
中郎祕文章宰相知

公會爲王文
端相國記室

故情那易忘秋淚落江

湄

與王介父話別

一夜空階雨輕寒壓短檠飄零今若此離合最關情善恨
須拌酒多才莫近名相期在千古努力愛平生

歲暮懷人六首

錄二

蔡季材

蔡君絕似權德輿傍舍無田甯有書裁翦烟花落筆底共
擬美錦臨風舒神機蕩漾性轉僻眼冷不見油幢車有時

興發縱孤往郭外倒騎秃尾驢移家僻地不厭頻但願遠
俗安吾廬苦吟竟日屢叉手春愁夜結流黃裙曉來寫詩
寄惆悵汾江水遠沈雙魚吾人適情本有謂厭厭詎必同
曹蜍鶯花滿眼杯在手懷人淚灑孤窗虛却愁東風慣吹
夢往事難尋花落餘

馮穎中丈

綠楊繫春春不住滿院飛花天欲醉愁煞多情馮敬通白
頭自酒傷春淚別來三月頻入夢夢過徵歌舊游次不見
琵琶唱紫雲但聽琴聲發遙思近聞鍊性頗好道栽藥自
耕霜後地城南豔曲未全刪留作平生枕中記我懷幽恨
日沈痼坐對鶯花歎憔悴履迹衣香不可尋鬢絲禪榻他
年事由來愁緒本無根有情木免終爲累何日論心過短
籬共酌春醅寫幽意

茶蘼露

茶蘼縹綠殿春芳春色誰人解善藏仙掌月明珠有淚錦
屏風定盃留香蕭娘袂薄脂痕膩姹女鬟高霧影涼最是
夜闌幽夢醒枕函扇底暗浮將

無題

墮珥餘香無處尋畫樓斜日碧雲深詩人未老桃根死從
此春愁倍不禁

寂寞紅闌首重回幾曾心死似寒灰白楊春雨歸何處濁

酒江頭酌一杯

永伯重來粵東賦

曉日芻尼繞屋鳴黃奴先辨扣門聲三年濶別渾如夢千
里重逢倍有情貧不賣書真令子病還中酒忒狂生可憐
我亦窮愁者心跡同論淚欲傾

夜過蘭湖

錄二

年來身究爲誰忙詩債經時竟未償閒坐水雲等斷句寒
鐘敲落一天霜

前輩風流不可攀摩挲遺墨一長歎靈飛丹藥人間少并
作蘭亭善本看

沙口重別伯兄

瓜步洲邊手乍分片帆兩地悵斜曛何緣夜半重迴棹復
得尊前再晤君歲晚脊令悲急雪年來兄弟似浮雲寒潮
東上催人別一路猿聲不忍聞

贛州訪袁永伯不知其處

故人經歲別夢隔嶺頭雲孤棹今來此相思不見君登臺
望春色倚杖對斜曛惆悵空搔首鐘聲蕭寺聞

峽江

一水穿雙峽孤城隱亂山暮天聞水碓斜日掩柴關地憶
巴邱舊溪如碧玉環欲尋梅福宅應在白雲間

清江道中聞雁

蒲帆日暮卸江干風雨燈昏雁影寒自度嶺頭歸夢斷尺
書勞爾報平安

河口有寄

長途終日雪漫漫行過西江十八灘不是浮梁買茶客琵琶休向夜來彈

雨中過七里灘

山氣化雲雲化雨雨注灘頭灘愈駛恍惚倒流三峽水我行西江屢見此是時北風吹白波來船順風齊唱歌下灘船比上灘易我船甘讓來船過來船順風我順水上灘下灘各足恃天風究有南來時孰若水流日無已須臾雨歇雲歸山山中雨落山泉間琤琤萬壑瀉珠玉縹緲遠岫堆烟鬢鮮花活水風中見畫本天然得生面羨煞高人一釣竿此地幾同磬石莫客船過灘恆苦遲我船過灘遲更宜要看七里灘頭月好作灘行七里詩

楚齋舊詩後集三

八

登謝皋羽西臺作歌

西臺釣臺相去不盈咫尺百年間兩奇士釣臺雖比西臺高參軍似較先生豪先生故人作天子參軍却值文山死故人恩重身名全文山一死事已矣冬青誰種南山陔大廈曾無一木支布衣策杖去何適獨上高臺哭所思時汐社人餘幾巖南先生全歸子天荒地老歌招魂殘年淚落吳江水朱鳥不來啼夜鳥寒風蕭颯吹蒲菰平生只有許劍錄身後誰傳芳草圖千秋埋骨釣臺旁此人真合名山藏小爐峰下謝豹花開矣復有詩人來此同瓣香乃知古人先後原同揆一生一死惟知己富貴相忘憂患同其

中生死皆天公

杭州

七年客路行剛半九十春光此正中柳色暗遮湖裏外花
香不辨陌西東地從淤塞思坡老人得句留憶白公獨惜
青衫太蕉萃酒痕著處已朦朧

水樂洞

我行烟霞嶺山青氣濛濛
峩然見靈洞石乳寒雲封
流泉不歸山挾雨鳴錚鏦
無心中宮徵搏擊聲西東
頓疑蓬島仙鈞天奏層穹
又疑洞庭樂縹緲隨天風
天風何飄飄吹落叢山中
冷冷坑谷裏終古酣笙鏞
靈籟發自然悲響殊奔淥
風簫有妙理底用吹璫箏
拂簟臥清晝側想造化功
歸途蹋松石回首蒼烟濃

楚塵齋舊詩後集三

九

飛來峯

靈山本縹緲散作羣嶂脈虛無不知處拔地忽千尺行經
合澗橋巖峯訝奇特嵌空何玲瓏戍削雷斧闢縱橫開茵
茗偃仰攢劍戟無煩夸娥負寧費巨靈擘何來一胡僧慕
見似曾識轉思鷲嶺旁豈與三峯拆迴看盤陞處向帶烟
霧迹蟠枝有奇木冬夏青巒懸危根不假土磊砢羅碎石
山風吹欲動離離走巖隙却疑虬龍枝亦自化人國側身
探洞戶露猿嘯寒碧幽絕靈隱前護此林壑僻俯聽冷泉
聲更試天竺屐

散花灘上閉門居
句曲曾傳物外書
絕勝仙人朱野鶴
一溪雲水自樵漁

油菜花開如散金
柴門半掩白雲深
西溪日暮誰招隱
隴上鶉鳩啼綠陰

小住經旬亦夙緣
垂楊不縮渡江船
酒痕留得春衫上
他日相思定惘然

將來杭州書巢招同鐵舟餞飲湖上

客裏逢春當夢看
春來幾度倚闌干
名山何日能重到
晝

本天然許借觀

湖心亭榜日天然圖畫

一月旬留緣尚少
他時約略說應難
花前對酒真清絕
兩箇詩人一懶殘

遊圓妙觀道士出江右
顧耦耕所畫靈寶度人經變

楚香齋詩集三

十

相卷子見示并乞書經卷上系之以詩

獨敏元關訪鍊師
金牌重話六朝時
長廊日暖燕來早
古院雨香花落遲
文字因緣原易合
鬼神情狀不難知
只嫌筆硯荒蕪極
定惹天台老丈嗤

早起至元墓登絕頂作

山鳥喚人起支筇
訪元墓白雲未出山
都作衣上露曉鐘
來何處恍惚導先路
徑曲如旋螺行行入
烟霧靈烏恰初上
殘月猶在樹落梅三
寸深太息春已暮
羣山競排闥懸磴忽
飛渡昔賢此遺蛻日
久將沿誤尚餘燕銜
泥精靈或常駐崎嶇
歷林壑絕頂恰已踞
湖光三萬頃波濤迭
吞吐七十二芙蓉一
一指顧風烟接混茫
陰晴各殊趣山深

絕塵跡地僻愜幽素慨然思結廬猿鶴若相妒徘徊望西
磧欲去身仍住何時謝俗緣高咏遺山句

山塘雜詩

錄二

綠莎小院月如銀忽覩雲英掌上身閒把琵琶訴飄泊銷
魂總在不會真

我亦三生杜牧之春風江上偶來遲鈿蟬金鳳俱零落

飛卿

句愁見當年畫壁詞

潤州懷古

錄一

春老孤帆指潤州江山極目感離憂潮聲夜撼西津渡海
氣朝吞北固樓烽火銷沈餘戰壘文章零落剩荒丘何心
更問藏春塢一曲淒清已欲愁

舟夜

楚曆舊書卷三

十一

不聞歌吹見垂楊流水棲鴉斷客腸却幸尚餘京口酒醉
看殘月下雷塘

揚州絕句

錄三

春風吹夢入揚州三月烟花動客愁却怪吳兒心似鐵玉
琴招鶴十三樓

宴客家家倒玉缸徵歌日日倚新腔青山也厭揚州俗寧
向金陵不渡江

玉簫嗚咽最難聽十載青樓夢已醒蹤跡未妨街卒報等
詩只在水西亭

藉甚王司理風流似牧之至今寒食候猶唱冶春詞花乍
蝶留夢雲陰柳不絲墓田斯地好荷鍾且相隨

露筋祠

古木棲鴉近夕陽白雲一片映湖光自從祠有荷花目干
載高郵水亦香

趙北口

客游倦程途到處異風壤誰能鞍馬間不作江湖想今晨
日忽清一眺窮泱泱微風被長堤烟水互相盪參差萬楊
柳霞麗日初上鷗閉不修容魚擲自生響隔岸浮青藍舩
艫列三兩居人此結廬生事絕塵埃朝耕葑上田夕結蘆
中網關南跡已陳浙右勝堪仿去去惜須臾他時憶清賞

東平州

馬頭方日落蠶尾
山接空青欲訪唐司業
先尋小洞庭竹
深涼似雨水澗夜涵星
獨酌不成醉
狂歌誰忍聽

盤山

漁陽巨鎮造雲端紫蓋高尊亂石攢瀑練光垂三十里松
濤聲遶上中盤天窮大漠鍾靈秀影落長城帶暮寒倦客
獨來憑眺遠蔥蘢佳氣滿長安

覺生寺大鐘歌

在曾家莊

招提昔搆曾城阿飛梁湧殿高峩華鐘駮學色相古登
樓觀者肩相摩冶工鼓鑄自何代紀年諦視歲已多燕藩
龍種御王氣北平定鼎投戎戈皇孫燕啄將卒死誅鉏正

直多殘苛掃除黑業憑象教虔開經廠安禪那吉金鏡役
錘斲指少師監造鴻爐窠趙趙猛虛建碣磬蜿蜒饗養紛
駢羅寸莛詎肯發纖響六僧響擊驚羣魔鏗鎗旬礪遏雲
表震聳鼓曠殊猷囉華亭學士擅楷法名經鑄出文不頗
諸天佛號復森列肅肅疑有神護呵高懸傑閣鎖紐壯坐
閔浩劫如恆河年深故址忽墮圯徒置萬壽驅高駝年時
日月丁未四尚聞談者能縷覩中間木鯨不復叩紛紜帝
里興傳訛黃鐘委棄瓦礫雜燭天寶氣蕤烟蘿 聖朝

覺生建大剎剗沙剔蘚光重磨瓊裹葢致始得地永鎮禪
窟期無它古來顯晦會有待聲價况復萬石過人間分散
法物少寶器往往歸頭陀方今 虞廷奏韶濩左羽右翮

諸雍和鐘兮位置已得所擊撞佇見隨靈鼉

洗象行

宣武城闈玉河上草淺沙平圍白帳象房初伏迎象來前
導黃門列旂仗數牛十豕形環奇目瞠耳聾頭尾垂寶帶
金鈴赤鬪披高蹄濶步山邱移卸羈去飾立突兀初纔沒
舛緣流嬉河中之水何瀾瀾激浪摩肩激雙齒修鼻輪囷
歛呀呷或起或伏或相倚倒身直下光破碎盪盪晴瀾失
清泚波心陡躍驚銀濤肩頭穩據蠻奴高蛟龍窟徒魚鼈
亂閃屍水怪紛騰逃惠養年深解人意浴罷奇毛獻餘伎
仰天乍聽銅鼓鳴鳴更作鬻策聲兩旁觀者動顏色香
車寶馬紛南城珍奇馴擾不足貴用備率舞遐方情須臾

鼓吹歸路擁蹠踏天街自矜寵回首平鋪匹練明夕陽倒射浮光動

十九夜桂杏農招飲席上賦此

北風拔地奔狂濤自辰至酉聲颺颺孤窗獨坐客愁絕思欲屏置無濁醪杏農主人妙解事小疊紙片邀朋酌寒颺戶外若相搏一燈屢滅行周遭遲回始達讀書處室暖似坐熊羆毛杯盤羅列荀蕨美得酒頓覺精神豪談心共喜覓肝膽論世未免多牢騷人生知己信匪易止酒却怪柴桑陶嗟余行蹤况靡定隨人俯仰如桔槔去留聚散亦偶爾良緣縱有難常叨白雲在天月當午轉瞬詎止爭釐毫此時爲樂不自覺他日若憶神應勞會須大醉臥甕側豈許四壁寒蟲號醒來執筆寫長句復訂後夜同餽糟

楚客書畫詩卷三

古

劉幼竹丁淵初招集尺五莊

風日暄和百二春鶯花著意趁遊人誰知十丈紅塵裏也有蕭閒自在身

小雲郎最解憐才一首新詩酒百杯綠樹四圍天尺五儘人斜日重徘徊

春夜

傳柑時節雨瀟瀟久客歸心不自憍獨酌屠蘇對寒蠟千金何苦買春宵

襄山

耶律文正墓在焉

朝尊襄山巔豁眼凌雲洞威紆南麓行俯見湖光空昔賢

播清徽增此墳塋重湛然老居士負材實時棟偉器夙已
殊錫名占晉用英謨佐龍興戎馬方倥偬安危繫九寓匪
曰懷汴衆未濟慙素衷詎戀閩山夢德藝兩垂芬書史稱
博綜生平乏休閒瓊簾事吟誦荒邱遡遺風像古修髯凍
瞻拜拂殘碑蒼涼臥翁仲

秦郵道中

三十六陂水孤城一覆盂柳陰沿岸密山色過江無井鍊
仙人葯波浮明月珠樊梁溪景好畫本借倪迂
憶昔秦淮海翩翩屈宋才三賢同列祀千古有高臺大雅
今淪歇風流孰主裁停橈泊烟渚吟望思悠悠

南昌晤鄭朗如

錄一

楚塵舊集詩後集三

五

殘壘一別苦相思此地逢君亦大奇握手共看衣上淚關
心頻問篋中詩杜陵去國原多感王粲依人劇可悲秋晚
章門淹信宿舊游重語各淒其

南昌贈袁永伯

人生如浮萍聚散本靡常一散復一聚各有天主張自我
與君交于茲廿載強中間數分合俱非意所量年時方北
征取道由豫章揚帆指贛水庶幾登君堂紅葉不知門一
水徒相望同行促振柁咫尺成參商因知覲面慳非止張
角妨四載客京華思君殊未央繁憂集耿耿尺牘終茫茫
君本生清門奕世傳芸香君性獨孤介自昔稱遺狂兀傲
不入時襍穢殊世粧貧賤勞其生骨月多隱傷作詩學長

吉焉得頭無霜自知非永年生曠營蒿邱千里索誌銘使
我摧肝腸自古達觀人心期空入荒榮枯豈逆料甘苦須
先嘗一念苟局促七尺空昂藏我游人海中得失心久忘
浮雲但仰視竿木還逢場悠然置六鑿不使加毫芒去秋
入矮屋妄冀高騰驤誰知骨無仙復使錐處囊落魄登古
原九月風悲涼河車警刁斗日下橫櫬槍變起倉卒中天
地慘不揚兇徒犯闕廷逆豎同披猖九門閉七日搜索
稽逃亡士人樂昇平豈曾經擾攘俯首念身世淚墮思家
鄉形影一室中太息成郎當因之百慮輕萬有同糝糠長
吟和稽阮酣醉歌羲皇驅車出都門泛櫂遊錢塘中秋達
江右半月淹南昌逢人輒問訊因悉周君詳別來幸無恙

楚曆舊詩卷三

六

願見心迴違惜隔崆峒雲

贛州有崆峒山

縮地無長房思勞夜多

夢入夢殊荒唐朝聞敏門聲傳說紛唶唶走出見君面見
面猶徬徨轉疑夢侮人作此好景光回環問再三驚泣泣
數行艱難復相見世事悲滄桑骨立識病多髮短知心長
秋雨夜蕭瑟翦燭欣聯牀有時歌當哭對酒還激昂我起
頻語君君意毋周章物理寓剝復哀樂關陰陽生才非偶
然致身須廟廊何爲及壯盛遽爾同老蒼苟淘芥蒂胸卽
境皆康莊我今返鄉國獨步方俛俛聚首知何時一別嗟
匆忙情深語益苦道在吾能匡勿以先入心轉灰成膏育
努力各自勉一失將無償臨歧贈君言遂多慨以慷

長年水驛又山程
飄泊江關倦客情
纔到嶺隅歸思遣
異鄉聲作故鄉聲

人日寄故園諸子

此日是人日
懷人因寄詩
草堂花發未
春水我歸遲
晝暖蝶尋夢
柳晴風漾絲
無緣共杯酒
何處說相思

春雨樓

錄一

素馨斜畔水西頭
楊柳含烟隱畫樓
不聽琵琶聽春雨
綠渠生小識春愁

落霞

錄一

六朝金粉未全消
斜日隨風下麗譙
一縷紅綃挂樓角
詩人常立水西橋

楚庭耆舊遺詩

後集四

南海伍崇曜紫垣緝

劉廣禮

字德亨一字寅甫番禺人嘉慶癸酉舉人著有息
機軒古近體詩 劉樸石云吾宗長甫寅甫智孫
兄弟翩翩競爽以詩才論智孫當爲馬氏之白眉
而駢四儷六寅甫尤長秦小峴侍郎賞之有羨子
華爛若雲之句 譚玉生云歲丙子余讀書簾青
書屋喜作儷體文愚谷先生云吾八兄寅甫先生
夙以此擅場盍往就正之因執業稱弟子先生亦
時過存問並以詩枉贈余答詩所以有拾遺舊雨
三春感吏部高軒幾度來之語先生嘗示余文一
卷云少作多學晚唐且間沿宋人格調故結響未
高近始欲宗法六朝而多病不耐精思且名心未
了舉業仍未敢拋棄故所詣止此子其勉之越二
歲而先生歿矣余哭先生詩有一事未堪如屬望
九原何處更追隨語又祭文云視余猶子瞻含殮
而無由知我何人憶生平而更愴則以先君子之
喪旬日始往哭也

茶村詩話寅甫孝廉駢體文鏤金錯采時仿唐人
而詩卻沿宋格五言如龍母祠江上漁家集縣前
不圖千里別未得一樽同七言如烏啼花落憐芳

草綠酒紅燈壁荔枝書任我觀難盡讀花如人病
亦須扶客况不忘驢背上詩心多在鴈聲中日脚
乍紅雲鬢鬢潮頭未落水瀾漫酒薄我無司業俸
天寒君有廣文氈雅近范致能楊廷秀

十二月初二夜康侯泊舟仙城明早即發不及送別
賦此寄懷

遠望長安路驚心已季冬船停初月夜夢醒五仙鐘倉卒
難爲別羈留不可從來春瓊島上盼爾最高峯

秋社

漠漠寒烟短短籬登場風景勝春時却憐燕子辭巢去閒
煞雕梁冒網絲

楚慶堂遺詩後集四

二

中秋夜雨口占

今夜天公太不情風風雨雨打窗聲早知如此淒涼甚悔
不前宵玩月明

自注此詩竟爲
辛未悼亡之讖

送歐厚邨之官陝西

今長安去古長安言作雄藩首領官折柳有情須盡酒積
薪無慮好彈冠潼關四扇驅車出華岳三峯立馬看併入
行囊詩筆健虞衡集後壯波瀾

江行

江行鎮日作南風湖水漫漫望瑞洪客况不忘驢背上詩
心多在雁聲中二千里計鄉猶遠三百錢沽酒已空一抹
殘霞閃金碧漁家晚飯柁樓紅

新城門外紫泉河掩映湖光漾綠波金碧樓臺行幄近此
邦常沐 聖恩多

當時楊柳茁金絲今日長條踈地垂自笑此身如燕子春
來秋去若爲期

行盡沂州數日程江南烟樹漸分明紅花鋪外如鉤月惹
起征人無限情

蘭山縣外青駝寺小店荒園竟有花零亂紫紅隨意闌秋
光無數映殘霞

馬蹄經月始停車銀燭頻燒遠寄書風雨對牀鄉國話不
知今夜在淮徐

楚庭著書遺事集

三

三人共唱大江東千里雲帆逐曉風輪爾重陽歸去早滿
頭花落酒杯中

又坐籃輿度玉山漫天風雨失烟鬢人家桑柘村邊屋盡
入濛濛溼翠間

縷縷廚烟入望中雨絲牽住總溟濛高粱小米村村是此
地猶存趙北風

豆棚花架引青絲窄窄溪流短短籬聞說秋成今歲好一
聲鑼響賽叢祠

訪梁二子春不遇賦感

不辭冒雨到迴瀾烟水空濛獨自看一舸鳳城歸幾日棠
梨花下墨衣寒

楚庭耆舊遺詩後集四

四

楚庭耆舊遺詩後集四

譚瑩玉生校

南海伍崇曜紫垣緝

倪濟遠

字孟杭一字秋槎南海人嘉慶丁丑進士官廣西北流賀縣恭城縣知縣著有味辛堂詩存 熊笛

江云秋槎同年詩如天半朱霞可望而不可即

譚玉生云秋槎大令文名藉甚舉進士時余年未弱冠故未獲謀面作宦粵西數年刻其初稿歸貽羊城諸同好余始得讀其詩嘗與君猷孝廉夜話嘆其哀感頑豔簇簇生新洵足拔戟自成一隊而古體尙不無遺憾君猷極首肯余言迄今幾二十

楚庭耆舊詩後集五

一

年秋槎君猷墓木已拱始得於笛江廣文座閒讀其未刻遺稿四大冊其古體有痛快淋漓沈鬱頓挫與杜陵相視而笑者何論東坡遺山也不意吾粵乃誕此才恨不起君猷於九京以証余之知言否也又聞秋槎性兀冪風流跌宕放誕不羈簿書迷悶殆非所堪以故十餘年不晉一階特好爲詩宜有袁于令三聲之謔而集中乃多爲民請命之作其沈痛亦何減元次山春陵行豈果縣令不可爲耶才人固不可測

茶村詩話秋槎大令與余從兄梅村孝廉同舉於鄉以名解元聯捷進士作宰粵西者十餘年顧側

儻不羣時與上官齟齬故詩多嗾殺之音死後歸
窆佗城宦囊如洗其子又以葛帳西華遽作玉樓
長吉若敖之鬼竟致餒而文人之厄至此已極然
遺詩綽有可傳絕不染西泠流派習氣句如風雨
蠻瀧秋士老琴尊高館故人多小隊刀弓狼總健
大寒風雨虎偃哀烟花好夢愁難續絲穀新謠感
易成才銷老瓦捶詩研夢入孤檠說鬼牀壇臺一
慟陳同甫款段吾師馬少游鐙前白菜供寒食江
上紅棉夢廣州誰繪流亡希鄭俠擬論鹽鐵仗桓
寬幾見勳名闕著作最難卿相換神仙銷魂天亦
唯傷別望遠人禁更感秋狸卧殯宮杯在地烏啼

楚響舊選詩後集五

二

故宅葉填街離別慣經身漸老山川原好福難銷
崔徽畫卷情人在陳起江湖販肆稀未應詩拙真
能達信是才清已近寒何哉誤喜真年少張儉誰
知舊黨人俗骨豈能輕富貴才人不幸託神仙垂
老粗能分菽麥無人細與話桑麻句不驚人詩懶
作事難如願氣先平海紅花爛淹歸榜山伯勞飛
辦短犂狂煩老守驚山賊死作真王配水仙水火
無交仍故我妻孥多累過中年號署散人同魯望
書宜傲吏志齊諧豈必襄陽讐李廌最難臨賀送
楊憑皆能擺脫凡近依傍一空固非尋恆格調

題居石颿二尹劍仙圖便面

七尺吳鉤制有神茫茫海內報恩身黃昏風雨如磐黑讀
罷陰符拜美人

西望停雲萬里長彈丸拋下返仙鄉街頭我亦工磨鏡零
落天涯毒叢隱孃

魚梁仍遲南陔柳波不至

鐵色江雲玉色灘驛門風緊野花殘岸喧蟲語天蕭瑟浪
打魚梁路屈盤布被寵如當夕妾秋山寒似讀書官觀濤
發病雄心在不見校生七發難時方抱恙

下灘話

下灘暮下灘怪鳴啼白日寒解一上灘咒風下灘咒石咒

交逼蕩我心魄盤渦怒旋千丈一擲解二飛弩渴驥勢弗

楚屋舊書後集五

三

能止倒插船頭露船底黑雲如鑿不可徑渡只昨日行人

分今日鬼解三沙崩岸摧軒波動雷人號鬼哭吁可哀紛紛

下灘何愚哉覆舟山千帆來解四

蒼梧

蒲坂龍歸後遺墟父老稱風雷盤大野琴衿殉孤陵黃竹
謠開祖鳴條史誤徵湘江誰極目想像翠華憑

容城江上望月

東望蒼梧野南望越裳關北望瀟湘雲西望滇黔山秦時

明月夜飛出照盡終古蠻天蠻天風浪浪送江水吹裂玻

璃一千里低頭笑汲江光寒忽見鬚眉落波底舉杯招月

如可呼吸瓶貯月看已無沙禽夢熟不知處容城城外青

山孤蒼茫回首灘江路險絕谿山厯無數鳶墮地盤白日
昏竹僵沙語黃雲怒散髮今坐天邊船似超羅刹成飛仙
關河兩戒一煙點攝向白玉盤中圓越王臺上歌詩客看
月今宵幾游跡欲騎黃鶴入青冥歸種菖蒲卧吹笛可憐
兩地遙相望獐花佗鳥心魂傷祖龍遺迹亦安在姮娥綠
鬢生秋霜談深螢火上衣冷漸見紅霞起西嶺捕魚一艇
過江來露溼松明澹無影

鬱林道中

落木荒岡古鬱林刈禾人半故鄉音牛羊影亂寒山暝餅
餌香微野店深他日歸裝誰壓石秋風行路怯聞碓勞官
莫說車生耳僕馬痛瘡己不禁

漏船謠

楚庭舊遺詩後集五

四

囊無錢坐漏船蓑笠補篷仰見天天晴猶可風雨殺我蠶
僵蝟縮解衣篝火溼薪不可炊上岸斫樹枝斫樹枝望吾
廬大野荒荒黑雲四垂吁嗟乎早知江湖漏船惡能作紇
干凍死雀

鞠花

蠻煙瘴雨不堪論冷落重陽舊酒尊昨夜秋衫壓琴枕幾
人歸艇夢柴門瓶笙苦誤詩肩瘦蛤蚧空啼野火昏我是
離騷經讀者落英唵徧古牆根

暮登興業城樓

宮宇深菁古邊陔極目秋屯萬馬來小隊弓刀狼總健大

察吼雨虎張哀燒畚漸近貉蠻俗借著真慙保障才差喜
豐年多黍稌柴門都到四更開

立秋

秋入蠻陔雜雨晴天低如墨海雲生煙花好夢愁難續絲
殺新謠感易成幾次看山遲席帽有人支枕話專囊鄰前
笑玉休官計臺笠東菑待課耕

立秋前一日夜次柳波韻

遙天一種荒寒色不爲鱸魚亦感秋衫角故人燈下影鬢
絲明日鏡邊愁女牆虎瞰星垂坂官舍雜啼葉打樓惆悵
與壚舊遊處五更鄰笛苦低頭

時得伍梅邨
同年凶信

鬱城雜感

楚歷舊遺詩後集五

五

闍黎鐘鼓過端陽牛背今朝出眼光飲壑天垂雌蜺紫種
山人蹋熱雲黃才銷老瓦捶詩研夢入孤檠說鬼牀深淺
能船沙面水可憐蘇小在家鄉

拂桑花發海東頭竿拂珊瑚舊釣舟長劍短歌天下事
蠶雨古時愁壇臺一慟陳同甫款段吾師馬少遊閱遍
入塵僧亦老松龕對卧話山邱

山岫閒雲畫餅名入關前日棄繻生便忘溫飽終何補翻
見詩書不近情今古屠鯨椎赤手尋常倚馬悔青睛風塵
負荊州望回首龍門淚暗傾

八雷書札袖中存手把荆花望遠村風雨關河兩兄妹春
私蘋藻幾田園諸王落拓歸蔥肆老褚尖危稱蕞門何事

青衫頻誓慕，礎明夜送隣垣。

得羊城諸友書感事御寄

水枕雲窓驟減歡，仙城書札到江干。年來白屋親朋老，秋
入荒畦鴈鴛寒。誰繪流亡希鄭俠，擬論監鐵仗桓寬。霜天
袖手蕭條極，極摘得園蔬不忍餐。

荒徼饑年怯路途，崧臺西去客心孤。水仙愁說孫恩在，博
士能知李涉無。浪打山圍天似井，邨深人少屋啼烏。駸弓
坐飲黃虜血，翻覺從前膽氣麤。

庚辰除夕

江湖秋枕鐵輪蹄，鴻爪年年賸雪泥。等是宦身仍感舊石
南城畔，五更雞。

楚庭舊集後集五

六

千佛場中祭酒推，名經漫滅壯心灰。詞人誤煞邛靈鞠博
得郎官便減才。

滿天風雪豆如鐙，縹面恆河感不勝。忍凍蕭齋盤邨坐，梅
花影裏打包僧。

煙花回首事茫茫，琴枕衣篝妥夢涼。無限中年絲竹感，善
愁洗馬老秋孃。

卅五年華逼歲除，鬢絲無恙老蟲魚。王官乞與營生壙，臥
讀龍威祕本書。

薄暮山行次南陔韻

春日春衫子，出城城牆花落屋檐平。看人蠟屐湖山計，入
夢聞鼉鼓吹聲。晚飯柴門邨女笑，東風茶具吠羆驚。蕭蕭

松柏家鄉路漸有遊人上冢行

落葉

滅滅銀牀一夕陰廊檐風勁紙窓深空山是處尋行迹秋
士無端抱苦心艇外寒波湘水籟燈前老淚雍門琴死灰
試撥應重熱好向瓶笙證去今

雨耳商聲到地銷離情長繫昔時條打扉有鬼吟胷并縛
帶何人拾墮樵粟起山肩詩更瘦落鐫石骨夢難招推磔
一奏哀蟬曲淒絕寒林舊板橋

賦罷蕪城墨藩涼六朝金粉滿園蟹鐵衾中酒疑疎雨蠟
燭煎茶問夕陽搖落更無茵溷感蕭條忍見水雲鄉杪櫂
帶得他生旨不爲飛蓬說斷腸

楚庭舊詩後集五

七

坐鞭如雨打衫輕落日河干送別情未必朱門諳此味可
堪殘鐸伴渠聲風沙歷歷長安道笳角蕭蕭廣武城忍凍
疲驢拌踢遍鹿墜深處暝煙生

仰屋四首

身前身後感茫茫耗盡雄心仰屋梁脈望幾時超羽豸欽
鴛從古誤鸞皇口無鄒衍談天辨耳熟樊侯種黍方紙上
誦兵真易事看渠匹馬度沙場

絕交書報滿城喧鶴蓋無陰晝掩門滅燭鬼尤憎叔夜買
痴人讓繡平原力追跛鼈風塵老身隱猶龍道德尊竟達
空爾君且恕漁磯依舊餓王孫

叱咤曾經萬馬暗年華彈指去駸駸庸才例好談經濟大

局誰當鑄古今墮地生天來世劫賣漿屠狗少時心簪裾
可是磨人物磨到微塵一樣沈
決計東歸詠考槃四年孤負惠文冠頭原未白身先廢眼
不能青世肯寬撫劍高樓燒燭短著書遙嶽遍衫寒雕蟲
篆刻成何事終勝勞勞戀棧官

道中偶作

厯盡蠶叢未息肩冬山如睡影摩天路途漸長風霜色仕
宦休談少壯年龜手釵鬟悲游牯牛腰詩卷伴吟甍停輿
已對三騶飲惜少黃墟酒似泉

極目平蕪落日黃齋廚敲火卸行裝閩人菩薩終無語息
蜡農夫漸有慶十里麗譙喧鼓角五更寒竈具餼糧出門
又是恩恩去月落烏啼粟木鄉

楚歷舊遺詩後集五

八

清明日作

滿路東風吹柳絲北門山店颺春旗鸞魚入市來禽熟憶
得吾鄉上冢時

親串年年代拜墳棠梨消息異鄉分墓田丙舍何時辦泣
向空山望白雲

六度清明半路途荒郊寒食入邨沽東坡老去參寥死要
憶前因夢也無

古謠

舉秀才不知書察孝廉父別居昭應書生騎秃驢不求聞
達飛鞭趨經明行脩伊古則無於虐古則無今也繁徇徒

去去二首

盲風伏雨日淒其岸幘鏗廚鬢有絲醒已欲狂何必酒愁
難免瘦不關詩放衙晝永看山早學圃春寒種菜遲去去
休論八州督俸錢新辦草堂貴

手注南華內外篇袷衣閒放柘枝顛命宮磨蝎原多厄藥
店飛龍更可憐幾見勳名關著作最難卿相換神仙勞師
收取邯鄲枕我墮人間卅七年

寓齋七夕

借得匡牀賦倦遊千峯涼色到門收銷魂天亦惟傷別望
遠人禁更感秋冰玉華年輪洗馬風沙塵夜問牽牛山程
水驛尋常換未信勞臣漸白頭

馬峯行館

楚庭舊遺詩後集五

九

一蒲團地掩柴闕示疾維摩丈室閒載酒門生來問字垂
簾書吏去看山風煙伏翼飛何數鐘鼓爰居聽已頑便擬
長齋陪繡佛青鞵布韞老人閒

桂嶺雜述五首

崔丞破署嬾哦松侍史鈔書客賃春我似支那脩白業一
龕燈火六時鐘

野史荒唐未可憑椒房遺事向誰徵山人賣藥歸山去石
馬低頭絡廢藤

耒耜經宜煮酒論稻花黃盡見孤村浮生苦被輪蹶誤心
死田家老瓦盆

五嶺平分此一山迢迢駱越入荆蠻推窓斗憶南歸日烏帽梅花大庾關

參軍諧妙語多危深夜青燐繞破祠研安燭花人岸幘秋墳聽唱鮑家詩

昭潭客感二首

遍地茹蘆近郭東板門深掩雨絲中元瑜頭白王微病閒坐江天兩寓公

擁被酸吟風滿樓茶鎗聲人大灘秋雞鳴不已天如晦不到相愚不解愁

鋪門同郭雨亭夜話

隄柳花飛打庫篷一雙人影雨絲中縱談門戶先垂淚久噉才名輒拊衷異縣仙舟陪郭泰少年奇字誤揚雄是非今後河干寘與汝來關射鴨弓

茶煙

一縷帖荆扉沙瓶活火微深篁看更碧獨鶴與之飛藥杵無人擣簾波有夢圍東風鬢絲短憐汝故依依

古祠

牧牛餘燼髑髏知隧道深深傍古祠秋色送雲來度嶺夕陽勸客去尋詩楓根紙帖招魂路牆角檠拋泣別時惆悵更闌呼老穆爲渠低首華山巖

落日

落日一杯酒今宵誰與持路長孤客得波遠白鷗知書畫

垂虹艇駛往夢雨祠
嬰媿爭索抱妒煞汝篙師

桂林雜詩四首

三百名灘轉怒雷
蠻雲黯慘入邊垓
山川一變中原局
詞

賦會無冠古才墓
近處祠妃馭降渠
監史祿祖龍開少陵

謾詡宜人地常侍
今朝帶熱來初春大熱甚於羊城

城闌如玦樹如煙
倒影琴潭落日圓
五嶺東蟠尊桂海三

湘南迤邐苗天中
宮策誤迎蠻事古
洞碑墓黨籍年我亦

清時臨賀令負芻
勞與指飛仙

銅魚深縮宰門雲
絕徼屏藩異姓勳
已見驅除終大長何

堪跋扈到將軍斜
街風捲靈旗字別殿
塵封卸砌紋毅魄

遼東應化鶴烏金
遺鋪又斜曛

楚簪舊詩彙五

七

水離峯獨路蠶叢
十日愁霖更惱公
錄補驂鸞矜掘筆羹

談射蛤縛柔弓酒
人有墓邀誰蹋木
客能詩笑鬼窮擬訪

二華君不見桃花
深放翠微宮

古園新水一路蹋
歌淒婉可聽因憶
珠江舊遊得詩

一首

青往連臂古雲坳
蒔得秧苗春便拋
歌中大意如此折柳人隨三

疊去看花門訪四
孃敲水天閒話傷
耆舊風土遺編證廣

交忍俊不禁停轡
立鷓鴣南荔又鳴鐃

採茶唱

有客不樂茫思家
東風門外吹黃沙
籠燈作隊鉦鼓競報

道邨人歌採茶簪
花傅粉咽憂語
婉婉蠻童男作童女虬髯

忙煞黑崑崙玉屏風底稱郎土阿夷阿等觀堵牆茶根色
嫩茶葉香做詭已殊囉噴曲婆娑肯讓踢搖嬈更有謎詞
通十索石礮蓮臆風騷薄花桶袞邀社老圍嫩隅詩待參
軍作此卽龜茲新樂府安事黃金買歌舞達礪柳瓢心太
平滿摘春芽祠去盤古纏頭一擲去紛紛後郟跳嘯前郟
聞忽憶珠江好圓月踏歌連臂花香薰渭城蕭瑟摩訶醜
我自高吟拍銅斗旁人休笑縣官狂蠻語年來諳已久採
菱採葛總堪嗤楚些吳歛合遜之竹爐風細茶膏熟譜入
淒絃和竹枝

白沙館三首 錄二

弓絃腦後餓鴟聲箜苦雲愁骨欲鳴聽到銀鐺翻雪涕六
年前是飽蒼生

楚歷著舊詩後集五

七

排闥飛空瑟瑟寒猺天洞壑別煙鬢闌風縹馬平生志老
向蠻陬飽看山

春正二日行次鵝塘作寄香雨

不到迎春便遠行

初六日
立春

柳絲門巷蹋歌聲別離慣是才

人事吟坐誰無故國情元鬢未霜愁陸展

時柳波初
喪陳姬

綺年

如日負周生竹爐鼎飯孤郟屋也算歸田賦宦成

煤深水宿秋江暮寒身世斷蓬故人鬼錄不知涕之

何從也謳音酸楚貽記室諸君

庫篷梭急水滔滔出網嘉魚縹玉醪十載交遊聞笛少三
更風露枕舷高寢門磨鏡齋殘具歸路郵書折大刀峽上

謠成淒更唱桃人土偶夢魂勞

時笠園樞將抵桂林故有第五語

哭吳香雨

凶札傳看慘更疑對牀舊雨共沾衣

鄧伯誠適至臨江

冷春似昨

同年隔破屋從今落月非秤水何人作劉惔刮棺無夢入

顏畿

本得熱證屢服補劑病遂劇

臨江便是山陽路日薄虞淵木葉飛

六載離悰一載歡天涯萍迹故鄉看吹笙消遣調獨妾倒

屣揶揄食雁官誰信上船真死別正愁歸權逼秋寒尋思

腹痛平生語雞酒期賒淚未乾

纔別長安又賀州書生窮到夜臺休從來牖下多黃馘慟

汝堂前兩白頭生博明經銜在施家餘長物蒯爲緜人琴

風義諸卿責葛帔西華忍見不

楚歷齋舊詩集卷五

三

碑本題詩墨儼然

君爲余題黨籍碑三首遂爲絕筆

臨風神愴晉陽篇身

經瘴癘原難料歲在龍蛇別有權地下清談陪輔嗣

劉雲樵逝

已半劫餘委蛻赴毗騫

聞屬續前數日自言初八當赴天年矣劫餘委蛻赴毗騫官職屬家人亟整衣冠如期而卒

移鐙轉塵淒涼甚如此人無四十年

感舊二首

戲把芙蓉兜率天凌雲一笑法華禪越江執手思王子綠

嶺吹笙作散仙苦厭青睛徐騎省徒傷白髮李龜年三塗

八難消除盡未了前因感逝篇

青翰舟迴記水涯一雙人影鏡中佳國風好色淫何敢天

日明心死不埋狸臥殯宮杯在地烏啼故宅葉填街琉璃

研匣誰料理瘦減腰圍賦綺懷

城上烏

城上烏尾畢逋母將雛城西小兒引弓射欲墮不墮毛血
下烏雛啼母霜濃月苦老烏飛落城喚拾餘粟歸巢哺雛
心淒酸雛痛不食老烏拊唵雛眠不安老烏翼寒旁有車
折軸黃雀噴噴啄溝邊粟卓雕側身飢攫肉老翁覓兒洗
脚宿街柝聲沈夜烏哭

聽寶孃琵琶

雲鬢低撥四絃秋高館梧桐瑟瑟愁我自泉臺思顧曲淚
痕人說爲江州

攬春八首

窓格垂垂屋漏痕乍晴天氣半寒温支頤坐愛鑪煙轉蹙

縮春衫晝掩門

蕭寺攜壺耐薄遊沙彌曾識宰官不重來略似元都觀一
樹桃花一段愁

印裏黃綉鼓吹高拍張慙舞敬兒刀放青嘶遍長楸下一
笑開官是馬曹

接籬倒著太清狂鞭指并州老葛疆沿路兒童隨拍手使
君今日醉高陽

香閨清諫古琴宜凭几東風鬢有絲市過羊車人已老怕

論花事到醅釀

題李清照小像

曲廊遊笛髻盤雅香霧濃濃萬樹花淒緊蠻江風雨夕冰

人衾枕夢推沙

鬼語神絃拉雜聽紙燈流到水心停瑜珈深鑲香魂在憑

仗金仙與喚醒

觀放水燈

巷無飲酒野聞歌大柿鳴鉦曳落河休怒偃師頻眴目金
銀久謝病維摩

夜過舊邨

校字無人踞照糠機停深銜月昏黃林婆老死黎生去路
轉牛欄認廢莊

東風

瑤札東風賦離羣斜簪散髻酒初醺才人綺語丁年悔新
鬼鬪歌子夜聞門守顛當快殺雨院埋屈戌釀梨雲深紅
落盡陰如暮禪榻蕭騷杜司勳

楚庭舊詩後集五

五

三月三日同人招集祝壽菴次前韻

襖衣來入鹿麋羣蒼蒿花開鼻觀醺禪事詠觴留佛證梵
天鐘磬隔谿聞鳩啼藻井延斜日犢卧荒臺弔德雲文字
語言今埽盡不勞經侈度人勳

漫興

禪榻蕭疎兩鬢華兼旬陰雨勒寒花欲浮遠夢春如海難
買青山畫當家佳日溫磨宜篤耨變風遊冶薄闌閣柵頭
舊是銷魂地垂柳今朝已著雅

春草四首

天涯極目足芳菲一段濛濛入翠微春水綠波遊子去雜
花生樹亂鶯飛牛羊風笛遙呼渡燈火霜蓬舊合圍河畔

幾人思遠道麴塵吹斷尺書稀

藉地拋琴小坐溫欲尋門巷誤煙邨拾鈿深巷春無迹埋
玉荒阡酒有痕詩夢可曾醒謝客綺年休遽怨王孫駟辭
白鼻東風細采罷靡蕪暗斷魂

相思何處寄清揚江路如茵水枕涼零露著衫宜慘綠畫
橈偎岸覺微香晴低蛺蝶濃熏翅老去芙蓉變斷腸莫鬥
裙腰天水碧南朝金粉倦思量

纔聽臘鼓燒痕蘇拖屐人來挈玉壺白髮易生憐我似朱
門已換識君無家留塞北傷環珮雨過湖南叫鷓鴣正是
踏青時節近芊綿補入上河圖

春江

楚庭舊書詩卷五

去

水遙篷背影參差十里晴峯喚畫眉柳縮峽雲涼閣柁江
天飯熟煮魚時

二月

窺堞山如笑昭潭二月餘春風紅豆國細雨白楊墟都督
飛傳檄時平郡閩兵江郵緩寄書遙憐鄉味好頓頓食鱒魚

花朝客思

水流瓜蔓雨瀟瀟卵色天低樹影遙海燕幾回尋故國蠻
花一例作生朝詩聯禪榻剛淘井人去仙城罷教簫痛飲
扶頭漫垂記晴湖香霧木蘭橈

怨歌

種秫爲漿種穀爲糧嗟我合歡變爲斷腸一解玉琴朱絃太

古血色刺船不來天荒海墨二茫茫蒿里陳人是歸昨日

前日烹鮮擊肥三卷旄拔心死者有來世手割天雞與汝

為誓四

盤古廟

天狼竄地招搖昏模糊頸血吳將軍靈臺偃伯屬功狗不
求上賞求嬋媛昔盟皦日詎可悔生甘同穴深山奔惟勳
不世後必大風蒸霧乳毛民繁侯藍粲胡姓有四天潢獨
游摩阿敦已先戌毋作鼻祖肯讓河伯稱外孫槃瓠盤古
號滋譌世胄混託洪荒尊廬谿石窟訖歐駱戢戢螳聚兼
蠡屯賀臨熟貉著版籍耳目恢詭難具論黃茅瘴起谿水
渾狗王生日開祠門坎坎吹蠶擊銅鼓霍霍宰豬滌袍鐔

楚曆舊書後集五

七

偏髻繡驅舞要眇傳芭淒響沿屈原人頭飲器事已妄雞
骨卜卦風猶存瓠蘼所出更荒幻未耐老婦尊餅盆九隆
祀龍竹王竹蟹戶亦酌鯨與鯢黃土搏人爾何與毋乃飲
水忘其源外家矧與詰汾異熊狸豹虎皆諸昆巍然僕監
萬山禰坤靈一扇開昆侖曷為帝子黜配食不及龍母歎
蘋蘩我朝聲教八紘暨禁昧膜拜天可汗旅葵遠底
西域貢雁狗競獻歸遺番頭飛鼻飲銅柱外錄著北牖詩
翰軒惟茲醜類險且出豈假爾輩為屏藩外臣特駭古皇
裔名山賜後風彌惇生歸土官熟隸縣馴爾獸駝安蛇蝮
跳梁勿教儂氏叛庶保腰臘孳生蕃事殊精衛等誌怪局
朔倉鵠無留墻六男六女互牝牡出後漢書水經注因之蔚宗穿鑿

逮道元牛蹄以北別一族枝鹿憬邈難相援虛虜震駭野
火燔銜髭竹鼠窺無厭懣然思古望不極叢柯策策風吹
帚

讀元史五首

僉名謝道清賜宅從寬典詩書授國公別館春雲暖指爪
見飛龍妖夢焉敢踐委曲爲保護雄猜忍鉏弱趙家一塊
肉朔漠禪宗闡遜位帝和林數傳祚仍衍天道實好還受
報原非淺奈何勝國後往往矜禽獮酷哉齊文襄拓跋無
一免

尙書設行省權臣競言利阿合馬已亡桑盧遞相繼彼詎
爲國謀貪恠便私計苛政如牛毛徵及錐刀細朝廷幸悔
禍旋用亦旋斃作法忍於涼邦本終焉替石人一隻眼崛
起乘其做縱斤空自戕魚爛誰階厲夜半奮銅椎足雪千

秋涕

斧畫大渡河六詔置度外當時安狹小遂使夜郎大豈知
闔中原南屏此其險假道始幹腹襄樊遽崩壞度騎誠不
便誰扼盤叢界勢以唇亡寒謀爲肉食敗廢興匪人事晚
哉羅鬼戒區區釣魚山據險思吳玠

世祖通西域象教源寔興羈縻寓深意番俗相因仍其後
勢轉橫莽齋遞求增真珈尤恣睢發掘宋諸陵天魔演揲
兒馴至璘伽真腴田百萬畝膏血供禪鐙堂堂劈正斧不
爲紅衣懲大都啼杜鵑法燼衰運乘功德死灰滅奚補長

城崩金亡非以儒元亡實以僧

漢武開玉門以斷匈奴臂唐時突厥良吐蕃中忽熾因循
終宋世不復河西地拓境一萬里蒙古何強鷲兵饑日益
增渠徒防內纍略定先中原破竹經營易後來勒遠略海
外提精騎俱藍暫款關瓜哇難入侍豈其國遽辱廣馭殊
軒輊一詔悔輪臺終屬英雄事不見賈捐之珠厓猶議棄
宋文信國公遺琴拓本

匡山海暗成連死日影淒涼動柴市橫玉庚庚五百年背
拓殘徽血光紫宣和祕印久銷沈故物猶存丞相琴笙歌
散盡佐軍計獨愛冷冷山水音遣問題詩手鐫字景炎夜
宿青原寺曾伴高齋玉帶生未殉西臺竹如意秋風颯颯

楚歷書遺詩後集五

九

黃鵠哀嶧陽地裂孤桐摧化爲烏味江水黑清廟朱絃安
在哉漆零齷額膠零腹似感金甌難再復臣節貞同寡女
絲臣心恨少漸離筑此琴襟褱閭中傳風雨龍潭飛水仙
卽看臨本稱絕筆鬻缺不甘爲瓦全百琴無主堂楹改御
囊宮絹稀和買書譜工憐趙子昂銘詞媿煞程文海畫蘭
卜視總清芬牙曠知音地下羣黃冠操出思歸引供奉江
南汪水雲

晏歲

晏歲稀人事山崦日落時屋寒呼爾栗水涸掘鳧茨書札
親朋斷杯盤父老嬉行行安稅駕短鬢一漉其

荆峽關懷古

荷祓兵稀見戍樓峽盤斷港不容舟鐵門飛礮經龍戰
磴懸梯飲馬留鳴咽清波空自去蒼黃晚局已全收太平
莫問丸泥事付與生猺說故侯

猺山老柟樹歌

日南奇樹多龍蔥大者斗絕猺山中老柟礪柯千歲物石
根凍裂流膠融螭僵虎攫遞交讓枯者崛強生尤雄力排
雷霆陷坤軸虧蔽日月摩蒼穹扶疏高舉白澤檐竇窳俯
爛靈蚪宮膏腴內益香溢節看似瘦駁翻春容郢人橋舌
貽且駭欲施斤斧難爲功邇年山獠恣狡獪此種始與人
間通連船捆載百蹄噉剝巖剔藪矜雕萼喬柯忽伴寶剗
鷓清廟欲起梅梁龍闕斷泉源豈天意鑿開混沌繫人工

楚庭舊詩後集

干

巋然此樹壽終古神物詎與凡材同尚酋銅鼓搥逢逢樹
下報賽牲醪豐古來八蜡息老物準諸祀典宜從隆天雞
白鷓不愁思部婁拱笏元雲封陽精鬱攸死氣出鐵幹久
絕三彭攻沅冥野燒天吹風劫火翁絕蕭邱紅女丁婦壬
競呵護靈瀋噴欲顏如童我願旋紋永門漢代柏呼吸元
氣無終窮野婆獻璽瘴毋避民無天札安畊耜君不見杜
陵迂拙古詩翁艸堂顏色縈心胸

兩黃雀

空城黃雀苦野田黃雀樂君不見塚下悲風出深竇破屋
無人鼠蛇門曖曖炊煙生遠邨忍餓自啄蓬蒿根空城黃
雀樂野田黃雀苦君不見折軸車邊呼翳媒斷竹續竹毛

羽摧啾啾黃口飛上樹天寒望母無時迴雀兮雀兮予心
哀

漆少府邀遊金芝寺

少府念我愁導我遊初地竹裏兩扉開樓前一峯蔽層巖
迴深轉花殿蘿房空爨松燭古篆隱几聞清鐘日落御史
臺荆榛作寒色剎那無古今雄哉象教力道心遂有得世
事殊相違拂衣浩歌去白雲蒼欲歸

雷祖廟

龍堂砰訇伐鐘鼓不祠雨師祠雷祖萬人香火一城喧礮
礮唯愁此公怒朝頰面旂影翻暮頰面旂影翻頭顱照水
膽落盆一旂十日兩五日汝不贖臯雷汝殛入廟門謁匍

楚塵舊遺謄集五

三

匍兩廊鬼笑人喘哭箕帚揚塵十指禿大巫醉飽小巫舞
歌瓊靡作棖誦經吹螺雷弗赦汝汝奈何豐隆無言人視
盃心旌搖搖旂不轉功德深時水圓滿哀哉更生天有眼
剝肉已破中人產吁嗟乎一年插旂殊紛紛未聞雷霆真
擊人老鈴跳嘯書佐喜日日酒肉肥其身汝不見縛柳車
焚紙馬飛灰如山積墀下何不將錢勺鰥寡

茶江返權牡丹花事闕矣抱病無憀適柳波以上已

詩見示豁然而瘳作此

鷗波客返煎茶舍滿院煙蘿鼠姑謝難補看花一日緣遽
完買券千緡價河豚欲上春江腥病入東風都有情蔽裘
儘寄長生庫服散全蠲力士錯錦帷繡被涼如水莫論傳

看到孫子骨出飛龍嬾一吟西施葬後誰哀誅不料苦吟
君更癯研光牋寫風懷右謝監寒潭浣婦精摩登媻席阿
難咒嗚呼名物多風塵憐才好色俱前因輕別春光事遊
謁笑我已支離人把君詩卷坐過日頓罄沈綿屬奇筆
壯遊腰脚已蹉跎舊夢江湖太蕭瑟花開花落一年期閉
門卻埽空爾爲明朝禱事還須展只恐羊劉罰酒杯

正月廿一日夜雪

人海聲遙櫟聲絕盃注井華寒碧結漫漫驚倒嶺南人拍
手長空看飛雪詠鹽詠絮皆非真瓊英一擣珠濛塵玉枕
雕鏤縮寥夢銀臺豁問峩同雲一更兼雨急庭柯飄拉雜
二更遞三更響斷鐙欹檠戰罷玉龍三百萬詩膽橫天出
天半此時呼洵息窗櫺已覺淒風刷牆幔故人斗憶京華
土驢載昌圖僵欲語鐵稜擁破門尖又糞火圍鑪燒鸞脯
嗟余嬰荒館老卧茶川濱停琴山鬼來窺門杜陵多病依
羌邨屯邊鐵甲夢寐百不到哀哉茅檐父老捫蝨頭如髡
頗聞六出花北地豐年論炎陬漏天受雨不受雪祇愁敗
絮難爲濕党家酒陶家茗暖倚肉屏呼不醒東郭履西華
裘道傍骨臭收無人君不見官坐吟詩瘦詩骨傲裘蒙茸
呵凍筆畸人更爲劉生哀冰車雪柱飢寒才

積雪嚴寒道中再作二首

雨霰光零故故陰客懷如水馬馱吟漁舟入畫竹蘆靜野
館隔谿烟火深擁絮七年談父老炊菰五夜夢園林田荒

久廢鉏犁手來試茶江白滿簪

茶把盤叨地主頻茄低雙版玉山皴埋頭便是消寒計蒿
目誰爲起瘠人深巷鴉孃豐咒穀前邨龍戶溼挑薪公孫
無事謀轟飲酒價增時到幾緡

三更發三灘乘月抵大河口

麥秋已過苦毒熟况復束體投低篷三更挂席急孤汎銜
枚似避偏師攻圓靈照耀到水骨兩岸蘋末生纖風鯨人
捧珠蓬萊衣將定不定馮夷宮遙聆悲健瀧拍枕便覺瘳
瘳冰填胸扣舷高發小海唱草根大笑酸吟蟲炯然影蕩
百身散句墮渺漭東坡同欲搥巨嶂閣詩筆斧柯去手難
爲功川原向背石漱齧江城咫尺青濛濛魚更隱遞遠磯

楚磨舊書卷五

三

出象鼻山橫截奔流衝估船坐月各不寐人隨烟水交玲

瓏義輪不久鞭赤日呼粥已報招提鐘

邀同人重遊金芝寺消夏

百蟲燒山塵漲奔觸暑來過江背邨導師導我入巖屋衣
袂似帶寒波痕中央不合大如礪諸佛低頭此避世上界
疑聞暗觸聲前峯忽挫飛樓勢隆隆洵天倚杵一綫炎
曦近亭午題名照見壁陰碑昨日遊人化爲古今日之熱
與古倫後遊爲主前遊寶夢中似入兜元國眼底盡是清
涼人茗椀蔗漿攜所愛誰問此時煩渴在壺頭曳足看軍
容我笑此翁真穉穢竹深留客緩緩歸回首石天橫翠微

因憶

京華過夏者六街驢背亂沙飛

署齋桃花六樹盛開

房櫳清晝春衫便，釵頭細茗風籬煎。絳雲一片飛不起，晝
出二月初晴天。桃花照眼見六樹，繁苞怒放紛交駢。綺疏
兩樹穠欲然，兩樹略亞牆西偏。一畝藻井一甍瓦，頗似穉
女嬌垂鬢。尹邢避面爲矜寵，赤城宮闕驂螭駟。沈水馨融
博山熱，圓波影入湘筠圓。唾痕燕袖紉欲滴，頰渦懶髓熬
微嬌。有時見花不見樹，香爲香國花花田。主人花下今華
顛，與花舊證前身緣。三篙新漲紅到底，畫船載酒名園邊。
深杯百罰不辭醉，玉山推倒飛英筵。鄂不茫茫眩銀海，濃
酣緩緩遺珠鈿。少陵合隊麗人作飛卿，側體金荃篇。艣枝
搖客渡江去，桃枝桃葉都堪憐。場來九度別鄉國，夢魂苦
被芳叢牽。坐中慘綠貌非昔，天花不著維摩禪。荒寒官廡
忽相覩，何異鶯燕皆神仙。一甌花乳洗花骨，醜面兼咒兒
童妍。種記劉郎手栽處，內二株余前
宰恭城所植門仍崔護題詩年。櫻
桃小字喚已矣，苔苔橫鴉鴛。東風顛買春人，嬾花莫惱枕琴
伴。汝窓陰眠。

楚塵著舊詩後集

五

獨立

獨立短牆西，江雲覆我低。乾坤但烟水，廬井有鉏犁。捲幔
除花蝨，移籠飼竹雞。漆園空著論，物性詎能齊。

北江雜詩五首

錄一

春光馱蔓故園同，蒿菜連朝八饌豐。一物嵇含須補狀，日

南花事曠山紅。

王人不識杜鵑花呼爲
曠山紅其實一物也

啼臬行

張旃惡鴛買忌鵬昌黎詩作射訓狐相傳北地稀惡鳥荆
湘以南時有諸我家瀕海見殆罕輒訝紀載詞多誣昭州
何意聚此族怪臬中夜嚙嚙呼貓精圓突吻入肉鉤爪駛
竿盤屋櫺酸風扇翅圓張蒲陰靈鬼物彰彰俱矜凶挾狡
了不畏聲勢慘厲非常羸是時燭滅天橫糊兒哭攬孃
衣裾主人拍牀色淒沮踉蹌飛出雞與臬始猶昏夜漸白
晝青盲不避金跋烏我聞臬羹古所貴去胖味盡桑椹腴
往年見彈偶求炙注目一發殘其軀焦顛登俎俸可悻手
欲下箸心踟躕而今欺我老無力指示獵卒彎雕弧公然
巧脫增懊辱擺撲亂瓦蒿藜枯爾臬勿恃虎負隅魚鱗有

楚歷舊遺詩集五

三

竹銛僕姑庭氏哲族肯爾貸會與破鏡同誅屠旣而默念
鬱且紆賈韓作惡真區區人生壽命日崩迫昨日死人行
路衢縱令深掘不入室精魄豈得留須與羣雛斬頸事過
虐坐隅凡對談終迂南荒卑溼天卯殼眼腦弱與鸞皇殊
白澤之圖可勝旣不祥之物無時無鳴呼不祥之物無時
無鬼門九首啼蒼鷹

西嶺宿田家

柴門鐙火深挂壁滿農具邨落氣多厲中夜寒葛屨絡緯
嗁近牀比鄰喚收苧綢繆聽婦子趣作襦與袴今年夏租
畢里正無唬怒早晚賣黃牛便可營昏娶人事多瑣屑羈
懷日乖迕偏不穩楠塒荒雞汝何故勞心慍不寐皎月出

簷樹

記客談禮陵大水事

方飯有客禮陵還爲言大水漫城邨淫霖三日瘦蛟出首
風揭瓦雲霾昏排廡萬怪夜惶惑鬼伯跳嘯頭如鼉人聲
雨聲浩呼洶江水飛立崩濤掀轟轟地軸忽下陷十家井
竈無一存盤拏渴虎掉尾取力所摧處襄陵原高者爲巢
下營窟白日不照陰潭魂長隄一綫螻潰穴破堞三版魚
夔門更聞湛玉禱方畢哀哉藁葬先王尊縣今方祭水閘而城已沒
浮浩劫此有幾死者已矣生難論我聞客語一酸鼻澹齷
無策悲黎元昨傳高堰河復決竹健弛絕長菱奔魚鼈沸
鬱柏冬日間殫盱盱丕無垠淮陽財賦天下最轉漕仰給

楚歷舊遺詩卷五

三

兼牢盆宣房何日塞瓠子私計不獨民饑飧逆回邇日構

弗靖傳烽遠照巴里坤藁街懸首忘覆轍喀什噶爾于乾隆二十四年掃

穴犁庭逆會投首今特其遺藁耳花門勢面噬遊魂由來 神武殺止殺

貔貅電埽兵奚煩終愁芻粟事飛輓宵衣未免勞 軒轅

西陲一月盼三捷玉關遙轉春風温沿河遠略付汲黯鑿

穴孔道馳張騫偏災入 告事偶爾 盛世豈有哀鴻怨

衡湘况號古澤國流移雁戶生生繁明年昏墊一醜奠可

料倍種禾生孫殘杯勸客須強醉雙淚與拭青衫痕更闌

語罷兩寂寞挑鐙館壁秋蟲喧九疑雲漲水鱗色莫遣噩

夢還鄉園

客感

落日高樓一筵淒子雲比舍問諸黎故人消息秋江遠薄
宦襟懷夕照低喜瘦要防華氏狗不啼翻羨會稽雞酒徒
嬾縛衣冠射聽鼓趨晨信馬蹄

茶江遇風瀕于危矣既免作寄友人

高不必呂梁遊深不必牛渚泊叶眼前衣帶生風濤便覺
長空慘無色我舟進寸退則尺蠕蠕中流一飛鷁舟人繫
纜爭性命險避巉嶮傍沙壁禍機猝發不及防朽索離衙
向空擲此時號諄更何益水盪頭船溼船脊爲人爲鬼一
版隔翻身仰窺魚腹黑豈知惡境天不愁故遣長驅速傳
驛陰符法以不戰勝波吼雷鳴人上石痛定相看各魂夢
已見炊烟出林白蕭條向暝風轉急似助行人洗驚魄平
生忠信竊自恃詎異幽明照相逼江神見赦有深意恕我
無田歸不得不然出入呼吸閒倖免區區豈人力盤渦夜
半叫鬼物下陷飢蛟百年宅江湖未有不死地潦倒餘生
天所惜作詩寄遠雙淚垂空涌江雲起如墨

九月廿五夜泊茶嶺灘

過灘日已暝停橈倚灘宿亭亭起樵爨烟散波上綠風漪
動寒蘆雲嶼出叢木前磯半巉露冬近地脈縮微聆水樂
奏啣軋車翻軸一嶺環如隄云是種茶谷桑苧所未經楨
焙誰見錄天寒茶戶靜狗吠嶺崦屋獨客淒心魂灘聲夜
逾肅何處磨嘈銅餅乳花熟

羅灣曉發

殘月忽墮水振柁問前路離家不數里昨夜蘆灣住漁莊
遠堪辨雞鳴急如故風勁一帆弱石角森向怒鼉背無片
苔崖粵出天鑄盤江不可讓作勢欲竟渡山寒鼉水碧清
夢破鷗鷺野田野人行糾糾兩葛屨心逐秋波旋孤城隱
松霧

驛舍晚出過東嶺山莊閒話乘月步返

山路犖確泥上鞮老松欲語淒詩骨茅茨枕水天昏黃鴉
噪炊烟出還沒迎門偶喜稚子扶杖杖頻通野人謁巷勤
刀尺急婚嫁壁挂犁鉏罷耕垡烏犍亦會人意閒或臥荒
畦或飲澁清霜初肅柳栗地白日已沒稜猿窟邊隅自苦
鮮蓋藏瘠鹵燒畬兩南粵今年荆楚蓄屢告百室漂搖瞻
黔突官倉升斗不療飢眼見鳧莖根掘竭化離始信生聚
樂死喪輒思貧賤活呼翁汝勿疚老醜穩著斑蘭飽糠粃
小湖明葦君章居任汝挽須儂拄笏但今破柵稀見虎豈
必照牆欣得蠖統如峒鼓亦知寒倏訝蘋蚪山燒發松陰
一別思依依回首烟蘿吐谿月

仙姑泉

玉女洗頭盆飛落三峯底雙鬢已駕烟剩此寒泉水單椒
掃蛾綠秀絕俯清泚瑟瑟珮環聲天風半巖起行人不敢
唾溪毛碧心髓當年兩金釵化作赤龍子龍去山冥冥龍
蟄石齒齒至今斗絕處爪壁痕留指想見呼龍人瑤扉咫
尺耳我來中峯下夢雨牽蘅芷白髮老劉郎照影非耶是

大台猶昔深靈靚嗟已矣

燕子巖

笏立殊蒼然對岸截江面瘦蛟寒可盪激漫冬不變皺攢
大劈斧勢聳高累甌木疏窾露水涸椒隱見青盤石四
圍白走沙一線陶穴非幽營石室訝滕龕野藤深蔽虧遊
屨苦搖顛溪山此爲最結構劇推便如何委榛莽地祗樵
人擅渡背烟生篔城頭日斜縣刮窟驚蟄蛇來巢悵春燕
三復王維詩僧龕幾時見

移寓盧氏別墅

維摩花雨榻頻移具載童牛緩緩隨栗里乞歸原有約草
堂小住不須貲鐙檠牆角拋餘物茶板廊頭別阿師寄語
主人休避客月明同過范陽祠

渡口

宿雁聚圓沙落月依寒溪波動月光亂人行雁驚飛側身
望天漢玉繩流向西殘霜白在地馬滑凌兢蹄稍見蘆中
烟野店堆牆泥菽乳鳴溜泉犬吠鐙照隄漁翁亦云起夏
夏推篷低袂衫不知寒炊飯隨鼻鷺人生各有謀勞逸理
亦齊遵潛愍行役清輝懷中閨載詠采薇章夢斷天淒迷

猛虎謠

越俚稀生人猛虎聚其族半爲人所化而乃飽人肉

解一北

山日黃霜葉枯眈眈直視當路衢骨肉不相識磨牙恣吞
屠解上士持虎頭下士捉虎尾倚之兼角之哮闕草閒死

三
展轉復展轉豪雄安可常一朝觸檻穿寢處爲人量

解四

髻一字米五斗人與鬼翻覆手

五

解危哉封使君治民死食

人肉食之徒有此事奄奄况汝龍編吏

六

送與樵歸廣州

鍵戶寡歡娛停雲黯天際驪駒方在門別我同心袂憶昔
我與君里閭初把臂玉潤各艸年輒盟車笠誓君呼我小
名畜我以爲弟顛倒換巾幘商量到文藝時復狎紅裘互
縱青絲騎御榆田舍翁逸氣不可制君才實天縱千細富
奇製我亦託雁行賦薄嚴徐麗詎料噉虛名作餅徒畫地
秋風鈍秀才屢蹶鄉闈試襴衫十四春我僅掇一第籍幸
通南宮官難典中祕幹材學烹鮮驅作風塵吏尉沽峒女

楚庭著舊遺詩後集五

三

鹽析剝山人屨蹙縮無好懷鞭朴親鉗鈇離君八寒暑更
塌迴谿翅一權訪衙齋風吹故人至喜劇遍妻孥方言諧
輿隸擊鉢夜篝燈看山晨倚襜愛詠洛生吟掩關仍艷鼻
白擲得師風豚鬻么且細豈徒乏豬肝餐飯慙粗糲君能
諒我貧瑣屑非所計茶江逼歲暮束裝決然逝此別無踟
躕強留詞轉僞哽咽痛在腹欲語頻揮涕君年四十六我
近四十二白髮漸盈頭壁立兩家累君母卽我母蘭陔潔
滄瀨寒士不出門此樂差自慰君交半豪雋蹤迹雲泥異
蔡謝暨蘇顏亦我金蘭契君爲致綢繆足抵疏麻逮楊孚
本俊流於君爲妹壻能歌估客樂頗負弦高誼君居牛乳
橋環堵蕭然寄焦廬蝸作垣鴻廡婦擁髻近聞埽巢痕家

具童牛備鼎酒肉場城市居不易計應移江邨薪米避
珠桂饑寒傍路人吾儕甘佗際慟哭始回車曷有神身世
錢刀須愛惜揮霍後難繼贈別當章弦兼爲鄙懷勵我非
熟中人摧眉事權貴墳墓矧天涯蕭條馬鬣龔宰木盼寒
雲每墮泉魚淚後年擬投劾歸及桃花鱖明知見面難癡
想客一遂君昨所乞硯竹篔簹深閤堅持石交心礎磨永
不做君歸坐著書肉譜倉曹志淳哉六合文贖剗三墳例
浮名安足論此實千古事搏沙苦易散飄蓬本無蒂慎勿
傷離惊契濶償夢寐話短心較長榜人催去柵維堞角鳴
鳴魚梁星嘒嘒瑟瑟樹盤鴉冥冥波上螭酒榼撤殘筵霜
帆遮遠滢去矣忍重陳川原莽迢迢

楚歷舊詩後集五

三

與樵懋原夜已登舟柳波邀菊初甥走送諸河達曙

始別作詩見示和韻

桃花水淺話汪倫蹤迹鳧漚記得親衾角共牽餘此夜燭
光猶慘况于人離筵狼藉歌迴櫂醉墨龍鐘淚滿巾要畫
河梁須補我未應旛蓋辱霜蘋

蠟梅花

天公刻意生寒葩細樣獨出漫天涯露房垂垂蠶釀蜜蜜
熟花開見尤物湘妻玉骨不可當別調適作薔薇黃若準
西湖論衣鉢偏祠合奉孤山妾北風一夜吹驛樓醉眼誤
觸思鄉愁大江前橫故關月轉恨南中少霜雪橫陳味已
嚼蠟餘濃香對汝彌清腴紙窓悵鶯兒酒高折繁英枝

在手檀心銅蓋矜絕奇冷伴詩人雙鬢絲詩人喚花被花
惱元祐諸公堪絕倒微吟一騎還出門山茨照水天黃昏
悼鹿

宗儒好武頗不俗愛索坡書換羊肉雨丁籠柵一壺隨餉
我原頭褐色鹿軒墀四顧了不嫻蹶起似在山林間暖茸
細護桐陰碧渾身迸露梅花斑豐草清泉破天械游戲芟
芟觸牆壞鎖逃西蜀羽人居貌入東丹王子畫主人十載
羈頭銜麇麇野性誰能驂會當騎謁紫陽伯葛中竹几供
元談踟促人間仙壽短低騫忽暗茶岷館可憐天闕爲風
塵誰忍蕭條行叮囑計無繻帛分微俸殉汝白茅餘一慟
生字長辭苑內脾秋墳不醒蕉邊夢微物無端感死生松
關萬里故人情冥行高蹈嗟何及得食聞呼意倍驚遺蛻
焉非返吾素上林脯腊紛無數且讀華陽瘞鶴銘莫問廬
陵射生戶

北洞岩

一禽烟鳴啼一樹雲梢綠醪錢作泥飲春風滿牛屋酒攢
紅葉溫圍坐錯折足稍起窺牆頭貌訝長官熟新正僅三
日官來殊錄錄平生悔識字日與風塵逐團欒羨汝曹歲
歲會親族願汝飲此酒百年無癯癯老死不出門飽啖黃
雜肉天涯得比鄰治世須庸福貴無裴冕助古柎何日卜
向晚馬蹄忙前邨喧爆竹

春江看山作

春風吹綠江邊山，山孤影照春人顏。夢然烟雨一詩艇，衝破春色冥濛閒。風裳水佩各清妙，隋帆翦翦明雙鬟。春波能濃客能淡，高枕不讓鳧鷖閒。茶鐺活火手親煮，瀟湘一碧叢蘆灣。蘆灣漁父呼欲出，似有敗屋扃柴關。眼前風物領取足，天公賣與錢真慳。唐賢愛賦花月夜，綺麗已落建安還。逋翁寫貌筆不到，此境秀絕人烟寰。楓容雅緻紛變態，眩目髣髴西犁軒。同雲忽割青石氣，被稜稜夕愁魚鰓。

江皋亭

臨觴意不懌，獨上江皋亭。條風從東來，蕭然吹酒醒。劍鉞割千山，詰曲波冥冥。嶠外此奧室，硤石牢關扃。一綫走蒼梧，水白天浮青。鹹潮忽東避，氣鬱魚龍腥。大荒送落日，丹

楚簷舊遺詩後集五

三

楓下迴汀狂呼顧，虎頭滿壁圖滄溟。

雨中招諸子遊祝壽菴看李花

煙卧小桃波，臥柳青絲油。笠料量久竹，雞雙喚破春泥忍。俊難禁，蕭寺酒亭東。叫絕連天白，剪雪裁霜樹。千百燕麥，蕪穰夢得愁鶯花。熱攪維摩宅，長空陰靄看更好。瀛洲玉塵戰，龍綺抵死詩翁媚。海棠白辱漫山堪絕倒，眼花落井俱微醺。張盧手挈飛乘雲，日銜青壁水烟絲。瑤臺深閉雲中君，當前趁酒不省錢。別後相思敗杉屋，我同元相乞辛夷飽。折繁枝心亦足，道人打鼓賓騎回。入城路滑初聞雷，明朝卻過題詩處。頭白園丁坐碧苔。

陰雨花關足溼病甕又度花朝矣賦此自慰

名與昨賞蘿菴花參差魚尾頰谿霞驚雷入夜忽起蟄前
門捲葉風沙沙石天靈霧黑到地白處雨脚垂如麻繩牀
漏訝壓槽注梯枕上瓦尤紛拏水光搖壁壁欲動一葉斗
泛魚蠻艇上垂苦霧下毒潦不持鼎鑊蒸爲痕經旬偃蹇
雙一足祕方屢乞藥陽芽彥咸半士差快意筆弱漢晉難
名家百花生日坐蕭瑟扶頭卯酒樽慵賒天風吹汝寒不
極疏枝大葉悲年華遙憐玉李更淒絕殘僧捫蝨牆粘蝸
青山不日叫鷓鴣芳餘百草烟光斜河上之歌古所痛與
花同病人天涯麥叢深深柳絲碧泥濘小巷停秧車蹢躅
欲聽珠絡鼓暫出已被兒童譁蠟燈無慘送白日賸有詩
句仍槎枒東鄰杜鵑好持護留待新霽看繁葩

社日

雨過叢祠半溼雲邨邨泥飲釀錢紛清時倉卒平戎策舊
事淒涼祭社文燕子欲來春水送柳花微熱夕陽熏無心
與乞治蠶酒鞭朴呼號久厭聞

柳花飛

柳花飛白如雪西風吹花寒東風吹花熱柳花寒熱不敢
辭柳花東西隨所之但願世人無別離無別離不折柳春
水萍生誓相守風吹不入行人手

出門時署齋牡丹一朵含蕾此日應放矣迴憶去年
著花亦寓平樂兩度不見坐憶成詩用東坡吉祥

寺韻

鄂君繡被遮成堆寒官風味真豪哉去春打槳昭潭來長
鬚走報歡如雷昨夜鼠姑相對開空益卧壁我却回入室
已被小妻哈蠻郎社鼓今年催一夢獨照荒畦哇萊無因移
寘篷底栽翦刀浪費東風裁兩年幽夢寄烟水花事恩恩
婪尾杯蘇晉繡佛甘長齋結習未盡花應猜橫江細雨天
黃梅子規啼罷遊人哀

作詩次日家書來知花已開

春愁滿紙遞江千石葉烟微水艇寒獨客坐懷花信息雙
魚似報竹平安金樽卯酒扶頭欠彩筆朝雲寫夢難傳語
閨人好收拾牛酥煎寄一卅餐

丙子生日書寄

楚慶舊遺壽後五

三

清鰥曉無寐盥漱離報衙念汝此生日遠隔江水涯蠶鹽
事凌雜豚鷓啼紛譁生作官人妻不識筭與珈飢劬汝甘
受祗益見者嗟一春半別離獨處同炮媧漫膚轉多病奉
佛親楞迦箒鐙坐煮藥鬢影風吹斜河魁事多禁諒我髮
已華入門貧賤俱往往規吾奢耦耕計終迂塵埋鹿門車
今晨知兩兒拜孀私憶耶金釵不須拔鄰醞猶可賒題械
寄慰汝屋底開名花

舟中閱 國初五家詩各賦一絕句

賦罷殘棋意惘然時危鄭五漫憂天河東豔婦松園友悔

不山莊伴種田

牧齋

白衣宣至誤平生雞犬淮南故國情誰奏通天臺下表玉

魚腸斷沈初明 梅柳

火自黃巾偽鄴侯龍門異代作荊州倉樓轉羨橫波俠能

白頭 芝麓

一潭有道碑生前秋谷苦詆諆開元盛事旗亭唱論

上辭 漁洋

歌少避兵中年礮壘頓縱橫彥回老作中書死已

輟渭城 竹垞

霜臺行用少陵負薪行韻

田於麗華青裙磨客黃孃家昭州嫠婦乃種菜臺
口容嗟斲鉏力倦霜畦立細蕊黃花蠶嬾入手擲

鑿破鎗餽粥何能給背上兒饑啼敲頸子身攜

楚歷舊壽集五

美

家無螺蚌拾當門心與鹿盧橫轉井飛蓬不著

痕醉出香油還嚼根鬱金堂上盧家婦笑倚雕闌種

讀先文正公奏疏

思陵初政誅姦璫委鬼息燄茄花黃門生閣老一朝盡東

林黨議殊披猖水火元黃屹相門齊楚蜀黨分左右黃扉

獨柄委烏程白簡交彈譏狗啖侍讀錚錚傳諫草請毀要

典識尤老力遏同文館獄興蒙翁心折倪鴻寶天下軍容

歸近狎上書又起陳新甲批鱗章疏輒留中債帥冒勳朝

泄省浩然拂袖歸故林衣雲閣隱春銓深燭堆競詆萊公

侈伎讖誰知信國心再赴春明朝局變黃巾青犢窺畿甸

佩璫難供室已懸
蟲沙盡化兵徒練
頭白時危移戶部
司農仰屋愁無措
餉煩卜式助軍儲
旨命朝恩客
烽火九門紅
內殿傳呼午擊鐘
散仗昨騎西掖馬
殉鼎湖龍
同時骨鯁回天力
石齋謫戍念臺榭
汀左近故宮
石填精衛嗟何益
鄙吝無人應屬壺
坐詩安得
公等清客當年宰相才
詞林故事唯香茗
言事大

宗道曰渠何事多言吾詞林故事唯香茗耳時目為清客宰相
明霞墓 在壺山側與酒人墓相近

黃閣零博久劫塵
小名鐫與子霞親
樓空燕子繞桃花
伴酒人錦瑟詩亡箋
嬾補相傳為
遠事誰真峴山亦有明霞墓碑
遂良頭白人

楚歷舊遺詩後集五

毛

娛一愴神

楚歷舊遺詩後集五

譚瑩玉生校

廣東火

